



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliorvm Omnivm Generalivm Et Provincialivm Collectio Regia**

Ab anno DLXXVII. ad annum DXC.

**Parisiis, 1644**

Gregorii Magni Papae I. Epistolarvm Liber IV. Indict. XIII. Anno Ordinationis  
Eivs V.

**urn:nbn:de:hbz:466:1-15221**

## GREGORII MAGNI PAPÆ I.

EPISTOLARVM LIBER IV.

INDICT. XIII. ANNO ORDINATIONIS EIVS V.

## EPISTOLA I.

AD IOANNEM EPISCOPVM RAVENNATEM.

Monasterium monachorum non per clericos nec  
laicos <sup>\* adoranda</sup> gubernandum.*Gregorius Ioanni Rauennati episcopo, &c.*

Grat. 18. q.  
2. cap. 10.  
Iuo p. 3. c.  
18.  
Anselm. 7.  
183.  
Ioan. diac.  
lib. 2. c. 54. PERVENIT ad me quod in ecclesia fraternitatis tuae aliqua loca dudum monasteriis consecrata, nunc habitacula clericorum aut etiam laicorum facta sunt: dumque hi qui sunt in ecclesiis fingunt se religiose viuere, monasteriis præponi appetunt, & per eorum vitam monasteria destruuntur. Nemo etenim potest & ecclesiasticis obsequiis deseruire, & in monachica regula ordinate persistere, ut ipse monasterii distinctionem teneat, qui quotidie in <sup>\* mī</sup> nisterio ecclesiastico cogitur permanere. Proinde fraternitas tua, hoc quolibet in loco factum sit, emendare festinet; quia ego nullo modo patiar ut loca sacra per clericorum ambitum destruantur. Vos itaque ita agite, ut mihi hac de re correcta causam sub celeritate nuntietis.

## EPISTOLA II.

## GREGORII PAPÆ I.

AD FELICEM EPISCOPVM ET CYRIACVM ABBATEM.

De ordinando monasterio Theodosiæ.

*Gregorius Felici episcopo, & Cyriaco abbati.*

VERELAM Theodosiæ religiose feminæ subditæ vobis satis series relationis explanat, in qua plura & non ad sacerdotalem pertinentia mansuetudinem contra Ianuarium fratrem & coepiscopum nostrum capitula comprehensa relegimus: ita ut post fundatum a te seruorum Dei monasterium, omne quod ad auaritiae turbulentiam præjudiciumque pertinet tempore dicatur oratorii ipsius dedicationis exhibutum. Quamobrem si ita est, ut antefacta eius suggestione comperimus, & in hoc quid-

EPISTOLARVM LIBER IV. 387

quam cognoscitis indecentius fuisse commissum , hortamur vt Musicum abbatem monasterii Agilitani , remotis prius omnibus præiudiciis , studeatis vt in monachos suos illic ordinare cœperat summopere vacare festinet ; quatenus ipso venerabili loco decenti regularique modo per vos Domino iuuante disposito , nec frequens nos prædictæ religiosæ feminæ de non impletis bonis desideriis suis querela concutiat , nec cum vestræ detimento sit animæ , si tam pium propositum aliqua vobis negligentibus , quod non credimus , dilatione torpescat .

EPISTOLA III.

GREGORII PAPÆ I.

AD DOMINICVM EPISCOPVM CARTHAGINENSEM.

De compescendis hæreticis sub grauissimis poenis.

*Gregorius Dominico episcopo Carthaginensi.*

VENIENS ad nos Prosper præsentium lator , respon salis yester , post alios vestræ caritatis affectus , secundo nobis vestras epistolas cum allegatione principalium iussionum apud vos habitæ Synodi chartulam porrexit . Quibus relectis & de vestro gratulati sumus , quem pastoraliter geritis , zelo , & piissimos dominos occasione religionis illatas venalium personarum remouisse calumnias . Maxime autem quia ita studuit fraternitas vestra Africam inconcussam seruare prouinciā , vt nullatenus deuias hæreticorū sectas cum feroore sacerdotali coercere negligenter . De quibus etiam omnibus sopiendis , & antequam caritatis vestræ consuleremur apicibus , intantum nos subtilius definisse meminimus , vt nihil rursus de his vobis responderi necessarium credamus . Quamquam ergo hæc se ita habeant , & desideremus omnes hæreticos a catholicis sacerdotibus vigore semper rationeque compesci , tamen subtiliter intuentes omnino nos tetigit , ne per ea quæ apud vos gesta sunt , aliorum consiliorum primatibus , quod auertat Dominus , generetur scandalum . Sententia namque a vobis prolata est in conclusione gestorum . In qua dum pro inuestigandis illis hæreticis admonetis , subintulisti eos , qui negligunt , substantiarū dignitatumque priuatione plectendos . Optimum est igitur , frater carissi-

*Concil. Tom. 13.*

Ccc ij

me, vt in his quæ foris corrigenda sunt prius caritas interna seruetur, vt simus mente subiecti. Quod maxime vestrae grauitatis proprium iudicamus, etiam personis dignitate minoribus. Tunc enim totis coadunatis viribus haeretorum commodius obuiatis erroribus, cum secundum modum sacerdotii vestri studueritis ecclesiasticam interius custodire concordiam.

## EPISTOLA IV.

## GREGORII PAPÆ I.

AD VICTOREM EPISCOPVM PANORMITANVM.

De Gregorio abate, &amp; Martia abbatissa.

*Gregorius Victori episcopo Panormitano.*

**L**ATOREM præsentium Gregorium abbatem atque presbyterum monasterii sancti Theodori nulla quidem ratio permittebat, vt post lapsum cellæ ipsius generali pena, ultra eipræesse debuisset. Qui enim tot discipulos per suam negligentiam ad infernum duxit, reliquis vñquam præponi non debuit. Sed quia longa hic est apud nos penitentia afflictus, fraternitatem tuam necesse est eum in monasterium prædictum recipere, locoque suo constitutus: ita tamen, vt Vrbicus monasterii mei præpositus dare aliquem de seruis Dei debeat, qui ei præpositus fiat, vt quod istius incuria negligitur, illius solitudine seruetur. Præterea ex monasterio ancillarum Dei, quod est sancti Martini, Martiam sanctimoniale feminam in monasterium aliud iniuste audio fuisse migratam: & Victoriam, quæ locum illius sequebatur, sicut audio, res monasterii distrahere, vt ad prioratus locum pertingeret, & ipsa post abbatissam interim inueniri debuisset. Quam rem fraternitas tua sub omni studeat celeritate corriger: cuius enim iam culpæ sit intelligis, vt ego tam longe positus, quæ in civitate tua aguntur agnoscam, & tot curis occupatus, quæ fieri debeant, disponam. Prædictam itaque Martiam in monasterium suum & locum suum volumus reuocari. Victoriam vero Fantino defensori nostro tradi, quatenus ipse eam discussiens, cui quid de rebus monasterii dedit, inueniat. Quam discussam in monasterium aliud dari volumus, nobisque per Fantinum defensorem subtiliter

Ioan. diac.  
lib. 3. c. 42.

renuntiari, vt sciamus quid de ea debeat sententia certiori constitui. Multa autem mala in eodem monasterio per Anastasium medicum audio contigisse. Qui si quando in monasterium virginum seu ipse, seu alias fuerit ingressus, fraternitatem tuam culpa respiciet, quæ gregem commis-  
sum tenet, & custodire dissimulat.

EPISTOLA V.

GREGORII PAPÆ I.

AD VENANTIVM EPISCOPVM LVNENSEM.

De Saturnino presbytero lapsō.

*Gregorius Venantio episcopo Lunensi.*

**A**CCEDENS ad Gorgonam insulam fraternitas vestra discutiat id quod ad nos de Saturnino expresbytero est perlatum. Peruenit namque ad nos, quia postquam pro crimine lapsus sui a sacerdotii ordine est deiectus, ad explendum ministerium sacerdotii præsumpsit accedere, & omnipotenti Deo hostias immolare. Quod si ita factum fraternitas vestra repererit, eum sacri corporis & sanguinis dominici participatione priuatum in poenitentiam redigat, ita vt usque ad diem obitus sui in eadem excommunicatione permaneat, & viaticum tantummodo in die exitus sui percipiat. Sin autem eum fraternitas tua talem poenitentiam agere cognoverit, vt ei iuste ad recipientam inter laicos communionem etiam ante exitum debeat misereri, hoc in tua fraternitatis ponimus potestate.

*Mense Octobri, indictione decimatertia.*

EPISTOLA VI.

GREGORII PAPÆ I.

AD CYPRIANVM DIACONVM.

De Manichæis comprimendis, & de tollendis pensionibus Iudæis impositis, vt ad fidem Christi facilius conuertantur.

*Gregorius Cypriano diacono & rectori patrimonii Sicilie.*

**D**E Manichæis qui in possessionibus nostris sunt frequenter dilectionem tuam admonui, vt eos persequi summopere debeat, atque ad fidem catholicam reuocare.

Ccc iii

Grat. diff.  
50. cap. 10.  
Iuo par. 6.  
cap. 83.  
Pan. lib. 3.  
cap. 132.  
Anfelm. lib.  
8. cap. 21.

Quod si tempus exigit, per te, si autem pro causis aliis non  
Ioan. diac.  
lib. 2. c. 44.  
 licet, per alios solerter inquire. Peruenit ergo ad me, esse  
 Hebræos in possessionibus nostris, qui conuersti ad Deum  
 nullatenus volunt. Sed videtur mihi ut per omnes posses-  
 siones in quibus ipsi Hebræi esse noscuntur, epistolas trans-  
 mittere debeas, eis ex me specialiter promittens, quod  
 quicumque ad verum Dominum Deum nostrum Iesum  
 Christum ex eis conuersus fuerit, onus pensionis eius ex  
 aliqua parte imminuetur. Quod ita quoque fieri volo, ut  
 si quis ex eis conuersus fuerit; si solidi pensionem habet,  
 tremissis ei relaxari debeat; si tres vel quatuor, vnum soli-  
 dus relaxetur. Si quid amplius, iam iuxta eumdem mo-  
 dum debet relaxatio fieri, vel certe iuxta quod dilectio  
 tua præuidet; ut & ei qui conuertitur onus releuetur, &  
 ecclesiastica utilitas non graui dispendio prematur. Nec  
 hoc inutiliter facimus, si pro leuandis pensionum oneri-  
 bus, eos ad Christi gratiam perducamus; quia etsi ipsi mi-  
 nus fideliter veniunt, hi tamen qui de eis nati fuerint, iam  
 fidelius baptizantur. Aut ipsos ergo, aut eorum filios lu-  
 cramur: & ideo non est graue, quidquid de pensione pro  
 Christo dimittimus. Præterea ante hoc tempus Ioanne  
 subdiacono veniente, mihi tua dilectio aliqua scripsit, quæ  
 omnia hora eadem relegens, multos dies interposui, &  
 post multorum dierum moram tamquam in memoria re-  
 tinens quæ legeram, ad singula respondi. Sed nunc, ut ar-  
 bitror, vnum mihi capitulum excidit: & de eo suspicor  
 nihil respondisse. Scripseras enim, ut mutui solidi rusticis  
 per manus quorumdam debiti conductorum darentur,  
 ne tollentes ab aliis, aut in angariis, aut rerum preciis gra-  
 uarentur. Quod capitulum mihi gratissimum fuit. Et si  
 quidem iam scripsi, ea serua quæ scripta sunt: si autem ex  
 eo, ut suspicor, minime aliquid rescripsi, commonitione  
 certa dandos solidos pro utilitate rusticorum non debes  
 immorari; quando & res ecclesiastica non perit, & ex ea  
 utilitas rusticorum leuatur. Sed & alia, si qua sunt quæ uti-  
 lia esse consideras, omni ambiguitate postposita debes  
 exhibere.

EPISTOLA VII.

GREGORII PAPÆ I.

AD EPISCOPOS ILLYRICI.

Ordinationem Ioannis episcopi apostolica auctoritate  
confirmatam.

*Gregorius uniuersis episcopis per Illyricum.*

**E**t nobis confert de sollicitudine vestra lætitiam, & fraternitatem vestram de sua reddit ordinatione secundum, si antiquæ consuetudinis ordo seruatur. Quia ergo ex epistolis quas ad nos per Maximianum presbyterum & Andream diaconum direxisti, in persona Ioannis fratris & coepiscopi nostri consensum omnium vestrū & serenissimi principis conuenisse cognouimus voluntatem, magna nos exultatio habuit, talem Deo auctore ad sacerdotii officium fuisse prouectum, qui dignus cunctorum est electionis iudicio comprobatus. Proinde iuxta postulationis vestræ desiderium, prædictum fratrem & coepiscopum nostrum in eo in quo est sacerdotii ordine constitutus nostri assensus auctoritate firmamus, ratamque nos eius consecrationem habere dirigentes pallium indicamus. Cui quoniam iuxta morem nostras vices commisimus peragendas, ideo fraternitatem vestram necessario præuidimus adhortandam, quatenus ei in his quæ ad ordinem ecclesiasticum rectitudinemque pertinent disciplinæ, siue in aliis quibus Canonum decreta non obstant, parere nullo modo differatis, ut caritatem vestram sincero eum iudicio elegisse exhibita valeat obedientia declarare.

EPISTOLA VIII.

GREGORII PAPÆ I.

AD LEONEM EPISCOPVM PRIMÆ IVSTINIANÆ.

De vsu pallii, & cura pastorali diligenter exhibenda.

*Gregorius Joanni episcopo primæ Iustinianæ Illyrici.*

**M**ANIFESTVM bonitatis esse liquet indicium, in vnius Grat. dist.  
63. c. Quia. electione cunctorum conuenire consensum. Quia igitur suscepimus fratrum & coepiscoporum nostrorum re-

latio ad locum vos sacerdotii totius Concilii vnto consensu & serenissimi principis voluntate declarat accersiri; gratias omnipotenti Deo creatori nostro magna cum exultatione retulimus, qui vitam auctusque vestros ita de præteritis fecit esse probabiles, vt omnium vos, quod est valde laudabile, facheret placere iudicio. Quibus nos quoque in personam fraternitatis tuæ per omnia consentimus, atque omnipotentem Dominum deprecamur, vt caritatem vestram sicut sua gratia elegit, ita in omnibus sua protectione custodiat. Pallium vero ex more transmisimus, & vices vos apostolicæ sedis agere iterata innouatione decernimus, admonentes vt ita vos circa subiectos beatissimis exhibere placabiles, vt rectitudinem vestram diligere prouocentur potius quam timere. Quorum si culpa forte poscerit, ita excessus emendare curabitis, vt paternum affectionatum de animo nullo modo relinquatis. Estote in custodia commissi gregis vigilantes atque solliciti, & disciplinæ zelo districti, ne lupus insidians, nec ouile turbare dominicum, nec nocere ouibus aliqua fraudis occasione praualeat. Animarum lucrum Deo nostro tota mentis intentione ferre festinate: nomen nos pastoris non ad quietem, sed ad laborem suscepisse cognoscite. Exhibeamus ergo in opere quod signamur in nomine. Sacerdotii prærogatiua si recta consideratione pensemus, sollicitis & bene gerentibus in honore, negligentibus autem profecto erit in onere. Sicut igitur laborantes, & circa animarum salutem sollicitos hoc nomen ante Deum aeternam ducit ad gloriam, ita desides ac torpentes vrget ad poenam. In lingua vestra vitam esse aliam plebs commissa agnoscat. Sit illis fraternitatis vestrae doctrina, gratus coercionis stimulus, & vita, imitationis exemplum. Quid enim diligere, & quid timerre debeant, caritatis vestrae sermo prædicationis aperiat, fructum efficacia vestra aeternæ huiusmodi retributionis acquirat. Inter haec vero & huiusmodi ista vos principally deliberaonis cura constringat, ne vnuquam ordinaciones facere tentetis illicitas, sed si quos ad clericatus ordinem vel potiorem forte gradum promoueri contigerit, non præmiis aut precibus, sed meritis ordinentur. In nulla ordinatione fraternitati vestrae commoda quolibet modo surrepant, ne laqueis simoniacæ, quod absit, haereseos illige-

illigetur. *Quid enim prodest homini, sicut veritas docet, si totum mundum acquirat, & suæ faciat animæ detrimentum?* Vnde necesse est ut Deum in omni quod gerimus attendamus, peritura & temporalia contemnamus, atque ad æternitatis bona cordis desiderium dirigamus. Xenia autem vestræ sanctitatis suscipere omnino nolueram; quia valde esset incongruum, ut a prædatis atque afflictis fratribus munera percepisse videremur. Sed responsales vestri alio me argumento vicerunt, ad eum illa deferentes, a quo non possent oblationes vestræ fraternitatis repelli. Illud enim vobis præ omnibus studendum est, ut venturo iudici animarum, sicut prædiximus, non peritura munera procuretis, quatenus & vos de vestra mercedis operatione, & nos pariter de nostra adhortatione respiciat.

EPISTOLA IX.  
GREGORII PAPÆ I.

AD PETRVM NOTARIVM IN SARDINIA.

De ministeriis Aleriensis ecclesiæ recipiendis.

*Gregorius Petro notario in Sardinia.*

**M**INISTERIA ecclesiæ Aleriensis, quæ secum Scyllium quondam episcopus Seuerinus detulerat, præsentium sibi portatores restitui postulant. Quia ergo res ecclesiasticae cauta debent solitudine præmuniri, hoc nobis visum est, ut in eadem ecclesia seu ciuitate episcopus, cui ministeria ipsa tradi possint, debeat ordinari. Sed quoniam Leonem archidiaconum, aliosque clericos eiusdem ecclesiæ illic esse commemorant; experientia tamen præcipimus, quatenus eos ad suam ecclesiam profici, ac eligere ordinandum episcopum sibi commoneat: ut dum Deo illic fuerit propitio consecratus, ipse ecclesiæ suæ res sine aliqua ambiguitate recipiat.

## EPISTOLA X.

G R E G O R I I P A P Æ I.

AD FELICEM EPISCOPVM SARDICÆ.

De obedientia maioribus exhibenda.

*Gregorius Felici episcopo Sardicæ.*

**Q**VALITER obedientia, vel sit reuerentia præpositis exhibenda, ex tuis quoque subiectis ipse non ambigis. In quare valde est vtile, si id quod disciplinæ vigor imponit, nullo cogente, humilitas laudanda seruauerit. Peruenit itaque ad nos, quod fraternitas tua Ioanni fratri nostro primæ Iustinianæ episcopo secundum morem parere despiciat, & nec decreto eius, nec relationi, quam ad nos direxit, iuxta consuetudinem voluisse subscribere. Quod si ita est, contristamur; quia superbiæ de te manifestum præbes indicium. Quod quam sit, præcipue in sacerdote, culpabile, diuinæ clamant admonitionis eloquia. Propterea hortamur, ut mentis tumore deposito, ordinatori tuo antedicto fratri & coepiscopo nostro humilem te exhibere ac parere non desinas; quatenus & Deus gaudeat in fraternitatis vestræ concordia, & alii de te sumant bonitatis exemplum. Nam si, quod non credimus, te in superbia permanere contigerit, distictam canoniamq[ue] disciplinæ correctionem contumaciæ tuæ nos fecito vlciscenter imponere. Bene ergo facis tales te sponte salubri consideratione præbere, qualis esse canonica coercitione exigente compelleris. Nam nec tibi denuo, post nostram admonitionem, licebit ad tuæ voluntatis arbitrium contra morem maioribus tuis inobedientem existere, nec tantæ nos indiscretionis ecclesiasticam cognoscas dissimulare vel differre vindictam.

## EPISTOLA XI.

G R E G O R I I P A P Æ I.

AD IOANNEM EPISCOPVM RAVENNATEM.

De vsu pallii.

*Gregorius Ioanni episcopo Rauennati.*

**F**RATERNITATEM vestram valde inuenio contristatam, pro eo quod in letaniis induere pallium rationis cen-

BBCL

11. 169. P. 1. 1. 1.

sura prohibetur. Sed per excellentissimum Romanum patricium, & per eminentissimum præfectum, atque per alios ciuitatis suæ nobiles viros importune expetit, vt hoc debeat concedi. Nos autem solicite requirentes ab Adeo-  
dato diacono quondam fraternitatis tuæ cognouimus, quia nunquam consuetudo fuerit decessoribus tuis, vt in letaniis pallio nisi in solennitate beati Ioannis Baptista, & beati Petri apostoli, & beati martyris Apollinaris vteren-  
tur. Cui quidem nequaquam credere debuimus, quia multi apud ciuitatem fraternitatis vestræ responsales sæ-  
pius fuerunt, qui se fatentur tale aliquid nunquam vidif-  
se. Et de hac re multis potius credendum est, quam vni pro  
sua ecclesia aliquid attestanti. Sed quia nos fraternitatem  
vestram contristari nolumus, & petitionem filiorum no-  
strorum apud nos minime frustrari; vsum pallii, donec  
subtilius veriusque aliquid cognoscamus, in letaniis solen-  
nibus, id est, die natalitio beati Ioannis Baptista, & beati  
Petri apostoli, & beati Apollinaris martyris, atque in or-  
dinationis vestræ celebratione concedimus. In secretario  
vero secundum morem pristinum suscepis ac dimissis ec-  
clesiæ filiis, induere vestra fraternitas pallium debeat, at-  
que ad Missarum solennia ita proficiisci, & nihil sibi am-  
plius ausu temerariae præsumptionis arrogare; ne dum in  
exteriori habitu inordinate aliquid arripitur, ordinate  
etiam quæ licere poterant adimantur. Data mense Octo-  
bri, indictione 13.

## EPISTOLA XII.

## GREGORII PAPÆ I.

AD PETRVM EPISCOPVM TRICALITANVM.

De visitatione Agrigentinæ ecclesiæ.

*Gregorius Petro episcopo Tricalitano.*

**Q**VONIAM Agrigentinæ ecclesiæ a nobis fraternita-  
ti tuæ visitationis commissa est cura, laboribus tuis  
aliquid ex ea vtile prospexitus consulendum. Propterea  
Maximiano fratri & coepiscopo nostro scripsimus, vt  
quartam, quam eiusdem ecclesiæ episcopum oportebat  
accipere, a die visitationis tuæ, vel quoisque illic eam  
solicitudinem gesseris, tibi debeat applicare. Vnde fra-

*Concil. Tom. 13.*

Ddd ij

## 396 GREGORII PAPÆ I.

ternitatem tuam necesse est mente solicita cogitare, ut cuius fructus ecclesiæ percipit, operam studeat solerter impendere, atque ad Deum illic animas congregare, prauos ab iniquitate compescere, & incipientes bona opera, verbo exhortationis nutrire, memor quod de ecclesia vniuersali dictum est: *Panem otiosam non comedit.*

Præ. 31.

## EPISTOLA XIII.

## GREGORII PAPÆ I.

AD GAUDENTIVM EPISCOPVM NOLANVM.

Visitationem Capuanæ iniungit ecclesiæ.

*Gregorius Gaudentio episcopo Nolano.*Grat. dist.  
61. c. Quo-  
niam.

**Q**VONIAM\* Festus Capuanæ ecclesiæ episcopus, in Ro-<sup>al. 50</sup>  
manæ ciuitate positus, de hac luce migravit, curæ no-  
bis fuit, quæ vniuersis ecclesiis a nobis impenditur, ad fra-  
ternitatem tuam præsentia scripta dirigere, ut memoratæ  
ecclesiæ visitator accedas: sic tamen ut nihil de prouœctioni-  
bus clericorum, redditu, ornatu, ministeriisque, vel  
quidquid præfati loci esse patuerit, a quoquam præsumi  
patiaris: sed omnem vigilantiam atque cautelam circa  
clerum plebemque eiusdem ecclesiæ exhibere te conue-  
nit, ut in vigiliis obsequioque ecclesiastico, sedulo ac de-  
uote debeant deseruire; quatenus fraternitatis tuae instan-  
tia atque adhortatione tales se in seruitio diuino exhibeat,  
ut irreprehensibile eorum valeat obsequium reperiri.

## EPISTOLA XIV.

## GREGORII PAPÆ I.

AD CLERVM ECCLESIÆ CAPVANÆ.

De visitatione ecclesiæ Capuanæ Gaudentio commissa.

*Gregorius clero ecclesiæ Capuanæ degenti Neapoli.*Grat. dist.  
61. c. 19.

**Q**VONIAM Festus Capuanæ ecclesiæ episcopus hic po-  
situs de hac luce migravit, curæ nobis fuit destituta  
ecclesiæ visitationem fratri & coepiscopo nostro Gauden-  
tio Nolanæ ciuitatis episcopo solenniter delegare, cui de-  
dimus in mandatis ut nihil de prouœctionibus clericorum,  
redditu, ornatu, ministeriisque a quoquam usurpa-  
ri patiatur. Cuius vos assiduis adhortationibus conuenit

obedire, quatenus in ecclesiastico obsequio, atque in Dei laudibus vigilanti debeat cura persistere, moresque vestros sub digna ecclesiastici regiminis disciplina compонere. Nec quisquam vestrum eius audeat præceptionibus obuiare, sed omni tam ecclesiastica obseruatione, quam etiam ecclesiæ vestræ custodia, eius prouisionibus obedientiam exhibere, quatenus dum eius regimini vestra fuerit obedientia commodata, & ecclesiæ vestræ in nullo negligatur utilitas, & eius sit cura propensior.

## EPISTOLA XV.

## GREGORII PAPÆ I.

AD IOANNEM EPISCOPVM RAVENNÆ.

Ne irrisorio sermone obloquatur, aut scribat: & de inordinato vsu pallii, & cura pastorali, aliisque quamplurimis.

*Gregorius Ioanni episcopo Rauennæ.*

**P**RIMVM me hoc contristat, quia mihi fraternitas tua dupli corde scribit, & alia blandimenta in epistolis suis exhibet, alia in lingua sua sæculariter ostendit. Deinde graue mihi est, quia irrisiones illas, quas habere notarii adhuc pueris solent, vsque hodie frater meus Ioannes in lingua sua retinet. Mordaciter loquitur, & quasi de tali astutia lætatur. Amicis præsentibus blanditur, de absentibus obloquitur. Tertio graue mihi & omnino execrabile est, quia seruis suis, qua hora furit, turpia crimina imponit, vt effeminati, & adhuc grauiter hoc apertius vocentur. Post hoc accessit quod disciplina ad vitam clericorum custodiendam nulla est, sed tantummodo se clericis suis dominum exhibit. Ultimum vero est, quod tamen pondere elationis primum est, scilicet de vsu pallii extra ecclesiam. Quoddecessorum meorum temporibus facere nunquam quicquam præsumpsit, nunquam a decessoribus eius præsumptum est, sicut responsales nostri testantur, excepto si reliquiæ conderentur. Quod tamen de reliquiis, vñus tantummodo potuit inueniri, qui meis diebus in despectum meum cum summa audacia non solum faciebat, sed etiam frequentabat. Ex quibus omnibus inuenio, quia honor episcopatus vestri totus foris in ostensione est, non in men-

D d iij

te. Et quidem omnipotenti Deo gratias ago, quia eo tempore quo ad me hoc peruenit, quod ad aures decessorum meorum nunquam peruererat, Longobardi inter me & Rauennatem ciuitatem positi fuerant: nam ostendere forsitan hominibus habui, quantum scio esse discretus. Ne autem credas quia ego ecclesiam tuam in aliquo graduari aut minui volo; recordare in Missarum Romanarum solennibus, vbi Rauennas diaconus stabat, & require vbi hodie stat, & cognosces quia ecclesiam Rauennatem honorare desidero. Sed ut quicumque quodlibet ex superbia arripiat, hoc ego tolerare non possum. Tamen hac de re iam diacono nostro Constantinopolim scripsi, ut per omnes qui sub se etiam tricenos & quadragenos episcopos habent, inquirere debeat. Et sicubi iste usus est, ut in letaniis cum palliis ambulent, absit ut per me Rauennatis honor ecclesiæ in aliquo imminui videatur. Hæc ergo omnia quæ superius dixi, frater carissime, recogita: diem tuae vocationis attende: quas rationes defarscina episcopatus redditurus es, cogita atque considera. Emenda illos mores notarii. Vide quid in lingua, quid in actu episcopum deceat. Esto totus purus. Fratribus tuis non aliud loquaris, & aliud in corde habeas: nec appetas ultra videri quam es, ut possis ultra esse quam videris. Credo mihi, quando ad hunc locum veni, tantæ deliberationis fui, tantæque caritatis circa fraternitatem tuam, ut si eamdem caritatem meam custodire voluisses, adhuc talerum fratrem, sicque te pure diligentem, tibique omni devotione concurrentem nunquam inuenires: sed cognitis verbis ac moribus tuis, fateor, resiliui. Rogo ergo per omnipotentem Deum, emenda omnia illa quæ præmisisti, maxime duplicitatis vitia. Permitte me amare te, & ad presentem, & ad futuram vitam utile tibi esse poterit, ut a tuis fratribus ameris. Ad hæc autem mihi non verbis, sed moribus responde.

## EPISTOLA XVI.

GREGORII PAPÆ I.

AD VENANTIVM EPISCOPVM LVNENSEM.

Delapsu presbyterorum, diaconorum &amp; subdiaconorum.

*Gregorius Venantio episcopo Lunensi.*

**R**ELECTÆ textus, quam fraternitas tua direxit, epistola, solitudinem tuam diligenter innotuit: sed cognita nos corporis tui molestia contristauit. Verumtamen dominica patienter debent sustineri flagella. Nam frequenter ad emendationem ægritudo conceditur. Et hoc ante Deum hominem purgatum statuit, quod in hac illum ad præsens vita contristat. Vnde necesse est ut creatori nostro etiam in infirmitate positi gratias referamus, & ut in illa nobis vita castigatio ista proficiat, exoremus. Præterea ad fraternitatis tuae consulta respondentes, statuimus diaconum & abbatem de portu Veneris, quem indicas cecidisse, ad sacrum ordinem non debere vel posse vlo modo reuocari. Quem quidem sacro ordine priuatum in pœnitentiam deputare te conuenit. Cuius si postea actus conuersatioque meruerit, priorem inter alios monachos, vbi tu tamen decreueris, standi locum obstineat. Subdiaconi quoque, quos similis culpa constringit, ab officio suo irreuocabiliter depositi, inter laicos communionem accipiunt. In portu autem Veneris, loco lapsi diaconi, alium qui hoc officium implere debeat ordinabis. Saturninum vero expresbyterum, vt nunquam ad sacri ordinis ministerium presumat accedere, scriptis cauere decreuimus. Sed eum in insula Gorgona atque Capraria solitudinem de monasteriis gerere, & in eo in quo est statu sine cuiusquam aduersitate manere permittimus. Fraternitas ergo tua commissos sibi vigilanti cura custodiat, a malis actibus sua, vt valet, prædicatione corripiat, quatenus & officii sui inueniatur, sicut decet, implere propositum, & Deum sibi retributorem suæ faciat actionis existere. Nos vero omnino vos videre cupimus, atque in Deo de vestra præsentia & salute gaudere. Vestem vero ei quæ baptizanda est direximus, atque vt nobis talia scribatis semper optamus. Codicem vero regulæ pastoralis domno Columbo pre-

Grat. dist.  
50. c. 10. §.  
Præterea.  
Iuo par. 6,  
cap. 83.

sbytero transmittendum per harum portitorem direxi-  
mus, quem vos nolite detinere. Nam vñi vestro alium  
sub celeritate transmittemus.

## EPISTOLA XVII.

## GREGORII PAPÆ I.

AD CONSTANTIVM EPISCOPVM MEDIOLANENSEM.

De his qui depositi sunt, quomodo ad pœnitentiam  
deputentur.

*Gregorius Constantio episcopo Mediolanensi.*

Grat. dist.  
50. c. 1.  
Iuo p. 6. c.  
cap. 80.

Iuo par. 6.  
cap. 69.

**S**i lapsis ad suum ordinem reuertendi licentia conceda-  
tur, vigor canonice procul dubio frangitur disciplina,  
dum pro reuersionis spe prauæ actionis desideria quisque  
concipere non formidat. Fraternitas siquidem vestra nos  
cōsulit, si Amandinus ex presbytero & abbate, qui a suo est  
decessore culpa exigente depositus, in eo quo fuerat ordi-  
ne constitutus, debeat reuocari. **Q**uod quidem nec licet,  
nec fieri posse aliqua ratione decernimus. Eius tamen si  
conuersio forte meruerit, sacro per omnia sicuti est priu-  
atus officio, in monasterio eum ante alios, ut præuideritis,  
monachos ordinate. Illud igitur præ omnibus studete, vt  
lapsos in sacrum ordinem nullius vobis supplicatio aliquo  
modo reuocare suadeat, ne huiusmodi non statuta, sed tē-  
poraliter dilata credatur eis esse vindicta. Vitalianum vero  
expresbyterum, de quo scribitis vt districte debeat culto-  
diri, in Siciliam dirigi faciemus, vt spe discedendi sublata,  
in pœnitentiæ se saltem tunc lamenta constringat. Iobinū  
quoque de portu Veneris quondam diaconū & abbatem  
suo decreuimus priuandum officio, atque vt alter in eius  
loco debeat ordinari scripsimus. Similiter etiam & tres  
subdiaconos, quos fraternitas vestra lapsos innotuit, a suo  
semper vacare, ac decernimus priuatos officio: quibus ni-  
hil aliud quam inter laicos sacra est præbenda communio.  
Saturninum vero expresbyterū ne ad sacri ordinis mini-  
sterium præsumat vñquam accedere, deputauimus facere  
\* cautiorem. Eumque in eadem qua fuerat insula cum sa-  
cri ordinis priuatione volumus permanere, permittentes  
ei curam & solitudinem de monasteriis habere vel gere-  
re, quem & ex suo lapsu cautiorem factum, eum credimus  
com-

commissos sibi iam nunc sollicitius custodire. De Ioanne autem ecclesiæ vestræ notario caritas, qua vos diligimus olimque dileximus, vt scriberemus admonuit, ne dum eius culpa prouocat, aliquid quod ad peccatum pertinet fierimandaretis. Hoc ergo cauentes, ecclesiæ vestræ res subtiliter modis sic quibus potueritis inquirite, vnde nec Deum offendatis, nec ille vos vnde apud homines accuset, valeat inuenire. Nam nos Ioannem non defendendo, vel contra rationem commendando eius personam, sed ne vestra magis anima stimulante furore in aliquo grauaretur, scripsimus. Vnde necesse est vt, sicut præfati sumus, ecclesiæ vestræ res subtili inuestigatione cum Dei timore perquirere minime negligatis. Præterea multum nos de Fortunati persona carissimæ fraternitatis vestræ mirari fecit epistola. Sed aut a vobis minime scripta ipsa dictata sunt, aut certe, si vestra sunt, nos in eis fratrem nostrum dominum Constantium nequaquam agnoscimus. Debuitis etenim & adhuc debetis attendere, quia pro vestra est opinione quod scribimus. Nam dum illic se prædictus Fortunatus violentiam sustinere, nec defensoris auxilio muni-ri potuisse commemorat, quid aliud nisi vestram attingit inuidiam? Ergo vt nec opinionem vestram hæc res apud quosdam obfuscet, nec ecclesiæ vestræ possit fieri in aliquo, si bona causa est, detrimentum; instructam huc debetis mandare personam, vt causæ qualitas trutinata sine vestra possit inuidia terminari. Quoniam præsertim post eius querelam, si illic pro vestris partibus fuerit dicta sententia, non rationabiliter, sed sola potestate credetur superatus. Nos vero pro caritate qua vobis adstringimur, quæ pro opinione vestra sunt, vt facere debeatis, non desistimus admonere; scientes quia etsi vos ad tempus adhortatio ista contristat, postea tamen deposita contentionis intentione lætitiat.

*Mense Decembri, indictione decimatercia.*

## EPISTOLA XVIII.

## GREGORII PAPÆ I.

AD ROMANVM EXARCHVM.

De Specioso presbytero, & ne sanctimonialibus ad  
sæculum reuersis auxilium præbeat.

*Gregorius Romano exarcho per Italiam residenti Rauennæ.*

**A**PVD excellentiam vestram prauorum audacia correptionis debet aculeos magis quam defensionis inuenire solatium. Nam satis graue est, si illic habere prauam contingat actionem refugiū, vnde disciplinæ debet prodire censura. Peruenit itaque ad nos, Speciosum quemdam presbyterum, qui causa poscente in monasterio a Ioanne fratre & coepiscopo nostro fuerat deputatus, contra sui pastoris exinde voluntatem exiisse, & ecclesiastica constitutionis vigore despecto, antedicto episcopo vestra fretum tuitione resistere. Quod quia excellentiæ vestræ fine dubio pulsat inuidiam, necesse est vt ab eius vos habita discretione beatistuitione suspendere: ne si nominis vestri occasione pastori suo inobediens vel contumax fuerit, ad tempus & vestros contra vos iudices defensare, atque excellentiam vestram hac ex re cogatur offendere, & nos pariter de vestra discordia contristare. Comperimus præterea, quod dici nefas est, quasdam mulieres, quæ nuncusque in religioso atque monachico habitu permanferunt, sacram vestem & suam velaturam deponere, & coniugibus, quod sine graui referre non possumus dolore, sociari. Sed hoc quidē vt facere vel attentare præsumant, fauoris vestri patrocinio fulciri dicuntur: quod nos credere peruersitatis ipsius acerbitas non permittit. Perimus ergo vt in tanto vos peccato miscere nullatenus debeat: nam huiusmodi iniquitatem impunitam propter Deum nullo modo patimur remanere. Vnde iterum quæsumus, vt excellentia vestra in talium se causarum defensione non misceat, ne & Deus suam defendat iniuriam, & inter nos aliorum pariat culpa discordiam.

*Mense Februario, indictione decimatercia.*

EPISTOLA XIX.

GREGORII PAPÆ I.

AD CYPRIANVM DIACONVM.

De obitu Maximiani, & de episcopo eligendo.

*Gregorius Cypriano diacono.*

**A**MARISSIMAS tuæ dilectionis epistolas de domni Maximiani obitu mense Nouembris suscepi. Et quidem ille ad præmia desiderata peruenit, sed infelix populus Syracusanæ ciuitatis lugendus est, qui pastorem talem diu habere non meruit. Proinde dilectio tua solicitudinem gerat, vt in eadem ecclesia talis debeat ad ordinandum eligi, qui post dominum Maximianum eiusdem regiminis locum non videatur immerito sortiri. Et quidem credo quod Traianum presbyterum maxima pars eligat, qui, vt dicitur, bonæ mentis est: sed quantum suspicor, ad regendum locum illum idoneus non est. Tamen si melior inueniri non valet, & ipse nullis criminibus tenetur inuolutus, condescendi ad eum cogente nimia necessitate potest. Si autem mea voluntas ad hanc electionem queritur, tibi secreto indico quod volo: quia nullus mihi in eadem ecclesia post dominum Maximianum tam dignus videtur quam Ioannes archidiaconus Catanensis ecclesiæ. Qui si fieri potest vt eligatur, credo quod apta valde persona inueniatur. Sed ipse quoque prius de criminibus quæ impedire possunt a te secreto requirendus est. A quibus si liber inuentus fuerit, eligi iure potest. Quod si factum fuerit, etiam frater & coepiscopus noster Leo ei cessionem præstare debet, vt liber ad ordinandum possit inueniri. Hæc ergo dilectioni tuæ indicare curauit: tuæ iam solicitudinis intererit, vt omnia sollicite circumspicias, & ea quæ sunt Deo grata disponas.

## EPISTOLA XX.

## GREGORII PAPÆ I.

AD SEVERVM FICVLINVM EPISCOPVM.

Visitationem ecclesiæ Rauennatis commendat.

*Gregorius Seuero Ficulino episcopo.*

**O**BITVM Ioannis antistitis directa relatio patefecit. Quapropter visitationis destitutæ ecclesiæ fraternitati tuæ operam solenniter delegamus, quam ita te conuenit exhibere, ut nihil de provectionibus clericorum, reditu, ornatu ministeriisque, vel quidquid illud est in patrimonio eiusdem a quoquam presumatur ecclesiæ, &c. secundum modum præhabitum.

## EPISTOLA XXI.

## GREGORII PAPÆ I.

AD RAVENNATES.

De visitatore Seuero.

*Gregorius clero, ordini & plebi consenti Rauennæ.*

**V**ESTRI antistitis obitum cognoscentes, curæ nobis fuit visitationem destitutæ ecclesiæ fratri & coepiscopo nostro Seuero \* Ficulino solenniter delegare, cui dedimus in mandatis, ut nihil de provectionibus clericorum, reditu, ornatu, ministeriisque a quoquam usurpari patiatur. Cuius vos assiduis adhortationibus conuenit obediare, &c. secundum morem habitum.

## EPISTOLA XXII.

## GREGORII PAPÆ I.

AD CYPRIANVM DIACONVM.

De obitu Theodori, &amp; alio episcopo eligendo,

*Gregorius Cypriano diacono.*

**O**BITVM Theodori episcopi dilectionem tuam iam credimus cognouisse. Sed quia ipse testamentum dicitur cōdidisse, subtiliter ne quid de rebus ecclesiæ suæ consumpsisset te oportet inquirere. Et si quidem eum exinde aliquid incongrue minuisse didiceris, ita age, ut res ipsæ ab

eo, cuius interest, modis omnibus reparentur. Clerum vero & populum loci ipsius admonere te conuenit, vt omni dilatione postposita, eligant qui sibi reuelante Deo debeat episcopus ordinari.

EPISTOLA XXIII.  
GREGORII PAPÆ I.

AD CASTORIVM NOTARIVM.

Ne ob pecunias quisquam eligatur ad sacerdotium,  
sed ob merita.

*Gregorius Caftorio notaria.*

**N**IMIS nos Ioannis fratri & coepiscopi nostri mors cognita contrastauit; maxime quod ciuitas illa hoc tempore amisit pastoralis curæ solatum. Quia igitur plurimæ vtilitates exposcunt, vt in ecclesia ipsa sacerdos sine mora Christo auctore debeat ordinari, ideo experientiæ tuæ præcipimus, quatenus clerum & populum omni instantia studeat adhortari, vt consecrandum sibi non differant eligere sacerdotem. Quos tamen & præ omnibus admonere te volumus, vt in generali causa vtilitates proprias non attendant. Nulla ergo sit in hac electione venalitas, ne, dum præmia appetunt, \* virtutem discretionis amittant: & illum dignum ad hoc esse arbitrentur officium, qui non meritis sed datione placuerit. Specialiter enim & absolute cognoscant, quia non solum indignus est sacerdotio, sed & aliis profecto erit culpis obnoxius, quisquis Dei donum precii præsumperit venalitate mercari. Non itaque largus præmiis, sed dignus meritis eligatur. Nam & electum & eligentes par poena respiciet, si sacerdotii sinceritatem mente sacrilega violare tentauerint. Siue autem unus, siue duo electi fuerint, quinque de prioribus presbyteris, & quinque de præcedentibus diaconibus simul venire ad nos per omnia commoneto. De clericis vero, præter eos qui venire deliberant, si quos alias præsentes esse necessarios aestimas, ad nos sine mora transmitte, vt ad ordinandam Deiecclesiam nec excusatio, nec aliqua possit præuenire dilatio.

## EPISTOLA XXIV.

## GREGORII PAPÆ I.

AD EVMDEM.

Vt renuntiet si fortasse de sacerdotibus quidquam indi-  
gnum audierit, & de Valerio monacho.

*Gregorius Caftorio diacono.*

**Q**VÆDAM ad nos de Pisaurenſi episcopo peruererunt, quæ indiſcuſſa nullo modo ſunt relinquenda. Propter ea experientiæ tuæ præcipimus, vt de vita & actibus ipsius ſubtili indagatione ſtudeat perſcrutari. Et ſi quid fortaffe repererit quod ſacerdotii, quod abſit, integritatem valeat maculare, ad nos eum cum ſcriptis tuis de his quæ in veritate cognoueris, omnimodo ſub competenti cautela transmitte: vt informati Deo reuelante ſubtilius veritatem, quid fieri debeat, per traetemus. Non ſolum autem de eo, ſed & de aliorum quoque ſacerdotum te vita conuenit eſſe ſolicitem. Et ſi de quolibet finiſtrum quidpiam ſentire potueris, nobis renuntiare festina, vt actuuum prauitas ſalubriter cum Dei ſolatio debeat emendari. Peruenit quoque ad nos Adeodatum quemdam ciuem Pisaurenſem filio atque vernaculo ſuo de quibusdam here-dibus institutis Thomam deputaſſe tutorem; hanc conditionem adiiciens, vt ſi forte heredes ipsius in pupilliaria etate de hac vita transirent, omnis eius ſubſtantia per manus antediicti tutoris debuiffet pauperibus erogari. Sed ab iis qui heredes fuerunt instituti, ne defuncti poſſit voluntas impleri, ſupraſcriptus tutor dicitur impediri. Propter ea ſi, ſicut edocti ſumus, ita eſſe in veritate compereris, curæ atque ſolitudinis tuæ ſit, antediictum tutorem rationabiliter tueri atque defendere, vt quæque ſibi iniuncta ſunt valeat effeſtui mancipare. Sed quoniam dicitur eumdem tutorem velle aliquid in diaconia quæ ibidem coniuita eſt emere, ſummopere ei ſolatiari festina, vt ea quæ mercedis intuitu pii cauif relicta ſunt, te concurrente fine cuiusquam poſſint impedimento compleri. Valerianum vero monachum, quem emendatum in monaſterio beati Ioannis in claſſe poſito tradidisti, in eodem eum monaſterio fine dubio volumus permanere. Præterea ne quam

Ioan. diac.  
lib. 2. c. 55.

necessitatem in expensis tua experientia patiatur, de redditibus sanctæ Romanæ ecclesiæ, qui illic te prouidente aggregati sunt, omnes expensas tuas te facere volumus. Et si quid superfluerit, nobis cum veneris defer.

EPISTOLA XXV.

G R E G O R I I P A P Æ I.  
AD VINCOMALVM DEFENSOREM.

Dat sibi potestatem ut munus defensoris accipiat.

*Gregorius Vincomalo defensori.*

ECCLESIASTICÆ vtilitatis intuitu id nostro sedit arbitrio, vt si nulli conditioni vel corpori teneris obnoxius, nec fuisti clericus alterius ciuitatis, aut in nullo tibi Canonum obuiant statuta, officium ecclesiæ defensorum accipias; vt quidquid pro pauperum commodis tibi a nobis iniunctum fuerit, incorrupte & viuaciter exequaris; vsurus hoc priuilegio, quod in te habita deliberatione contulimus, vt omnibus quæ tibi a nobis fuerint iniuncta complendis operam tuam fidelis exhibeas, redditurus de actibus tuis sub Dei nostri iudici orationem. Hanc autem epistolam Paterio notario ecclesiæ nostræ subscribendam dictauimus.

*Mense Martio, indictione decimatertia.*

EPISTOLA XXVI.

G R E G O R I I P A P Æ I.  
AD GAVDENTIVM EPISCOPVM NOLANVM.

Vt Capuanis clericis Neapoli degentibus quartam impendat.

*Gregorius Gaudentio episcopo Nolano.*

Q VI ecclesiasticis famulantur obsequiis, ecclesiastica, vt possilitas exigit, debent adipisci subsidia. Proinde fraternitatem tuam præsentibus hortamur affatibus, vt clericis Capuanæ ecclesiæ, qui in ciuitate Neapolitana consistunt, quartam in presbyterium eorum de hoc quod ante ecclesiæ singulis annis accesserit, iuxta antiquam consuetudinem distribuere secundum personarum studeat qualitatem; quatenus aliquod stipendiorum habentes so-

## 408 GREGORII PAPÆ I.

latium, ministerium, officiumque suum circa eamdem ecclesiam deuotiori mente prouocentur impendere. Præterea decem solidos, quos Rustico archidiacono suo Festus quondam episcopus suprascriptæ ecclesiæ abstulit, fraternitas tua omni cessante ambiguitate restituat; quia in tantam dicitur eum pauperiem peruenisse, ut conferendum illi potius esset, quam aliquid ab eo auferendum. Durum enim est, & procul a sacerdotis officio, & personam positam sub necessitate negligere, & studio congregandi indecenter inhiare pecuniis.

S. Bonau.  
lib. 1. c. 20.  
phar.

### EPISTOLA XXVII.

### GREGORII PAPÆ I.

#### AD CYPRIANVM DIACONVM.

De Cicerone monacho lapsō.

*Gregorius Cypriano diacono.*

Ioan. diac.  
lib. 3. c. 11. **B**ENENATVS frater & coepiscopus noster Ciceronem quemdam monachum, qui pro suis excessibus a dilectissimo filio nostro diacono Petro, tunc autem subdiacono & rectore patrimonii nostri, est in pœnitentiam depatus, iuris ecclesiæ suæ famulum esse perhibet, eumque sibi cum rebus suis postulat debere restitui. Necesse est ergo ut dilectio tua studiose perquirat. Et si ita verum esse constiterit, suprascriptum Ciceronem cum rebus suis, quæ apud Fantinum defensorem dicuntur esse depositæ, dominio Misenatis ecclesiæ sine aliqua dilatione restitue, ut postquam a monachica conuersatione culpæ lapsu se abripuit, iugum domini sui, quod euadere in conuersatione permanens poterat, recognoscatur.

*Mense Maii, indictione decimatercia.*

### EPISTOLA XXVIII.

### GREGORII PAPÆ I.

#### AD EVMDEM.

De monachis Theodosii abbatis.

*Gregorius Cypriano diacono.*

**P**ERVENIT ad nos insinuante Theodosio abbate monasterii sancti Martini tres illic in Sicilia monachos, quos pro

pro vtilitate monasterii sui transmiserat, remansisse, & pe-  
tit a nobis, vt cum tuo eos solatio in suum debeat mona-  
sterium reuocare. Dilectio ergo tua, quæ nos huiusmodi  
causas zelare valde feruenterque cognouit, eos solicita fa-  
ciat indagatione perquiri, & inuentos ad suprascriptum  
abbatem, cui contumaces extiterunt, sub competenti  
cautela atque districione transmitti. Esto itaque solitus  
ne regularis districtio, vel dilatione aliqua, vel deputato-  
rum remissione lñdatur. Præsentiuvero portitoribus, qui  
pro agendis eiusdem monasterii vtilitatibus a supradicto  
Theodosio abbate noscuntur esse transmissi, in omnibus  
te instanter volumus præbere solatia, quatenus te concur-  
rente, rationabiliter quæ sibi iniuncta sunt valeant expli-  
care. Mancipia autem eiusdem monasterii, quæ prædictus  
abbas ab hominibus ecclesiæ nostræ indebite perhibet  
detineri, necesse est te modis omnibus perscrutari. Et si  
ita repereris, sine aliqua ea facito dilatione restitui.

## EPISTOLA XXIX.

## GREGORII PAPÆ I.

AD SEVERVM SCHOLASTICVM.

Vt persuadeat exarcho cum Agilulpho rege Longobar-  
dorum pacem inire.

*Gregorius Seuero scholastico exarchi.*

**Q**vi assistunt iudicibus, & sinceris erga eos dilectioni-  
bus obstringuntur, illa eis suadere debent atque sug-  
gerere, quæ & animam saluent, & opinioni non derogent.  
Proinde quoniam nouimus quanta fidei sinceritate excel-  
lentissimum exarchum diligatis, idcirco magnitudini ve-  
stræ quæ acta sunt indicare curauimus, vt hæc cognos-  
centes, ad consentiendum eum rationabiliter prouoce-  
tis. Scitote autem quia Agilulphus Longobardorum rex  
generalem pacem facere non recusat, si tamen ei domi-  
nus Patricius iudicium esse voluerit. Nam multa sibi in lo-  
cis suis intra pacis terminum queritur esse commissa. Et  
quoniam sibi, si ratio iudicantium inuenerit, satisfieri po-  
stulat, & ipse quoque se satisfacturum modis omnibus  
pollicetur, si quid a partibus suis constiterit in pace esse

*Concil. Tom. 13.*

Fff

commissum. Quia ergo rationi non ambigitur conuenire quod petit, oportet esse iudicium, vt si qua ab vtraque parte male facta sunt, componantur; dummodo generalis pax fiat, atque Deo valeat protegente firmari. Nam qualiter sit nobis omnibus necessaria, bene nos tis. Sapienter itaque sicut consueuistis agite, vt excellētissimus exarchus ad hoc sine mora debeat consentire, ne per eum pax renui, quod non expedit, videatur. Si enim consentire noluerit, nobiscum quidem specialem pacem facere repromittit: sed scimus quia & diuersæ insulæ & loca sunt alia procul dubio peritura. Hæc autem considereret, & pacem habere festinet; quatenus in hac saltem dilatione & nos quietem possimus habere ad modicum, & reipublicæ resistendi vires, adiuuante Domino, melius reparentur.

## EPISTOLA XXX.

## GREGORII PAPÆ I.

AD HELIAM PRESBYTERVM.

De Epiphanio diacono, &amp; de solidis.

*Gregorius Heliæ presbytero & abbati prouinciae Isauriæ.*

**D**VLCISSIMA sanctitatis vestræ scripta suscepi, in quibus mihi satis fecisti, vt contrastari non debeam quod secundum meum desiderium ad beati Petri apostolorum principis limina non venisti. Et ego quidem omnino vos videre volui; sed si molestia corporis aut ætatis infirmitas obstat, aut impedimento fuit, hoc mihi sufficit, vt vbicumque tua sanctitas fuerit, pro me sollicite oret; quia et si locis corpore diuidimur, caritate semper indisuncti sumus. Euangelia autem sicut mandasti transmisimus. Filium vero nostrum Epiphanius mandaasti, vt ad sacrum ordinem prouehere deberemus, vobisque retransmittere. Sed in uno vos audiuius, in alio autem minime audire potuimus. Diaconus quidem factus est, sed quisquis semel in hac ecclesia ordinem sacrum accepit, egrediendi ex ea ulterius licentiam non habet. Si ergo vos videre non potui, hac ex re consolationem habeo, quia in filio vestro requiesco. Solidos autem vobis voluisti pro necessitatibus cellæ quinquaginta transmitti, quos multum esse aestimantes, ex eis nobis decem donasti, vt quadraginta

Grat. 1. q. 1.  
cap. 21.  
Anselm. l. 7.  
cap. 78.

mitteremus. Sed ne forsitan vel hoc graue esset, adhuc alios nobis ex eis estis dignati largiri. Sed quia vos valde in continentia nostra benignos inuenimus, eidem benignitati vice simili respondemus. Quinquaginta transmisimus, & ne forsitan minus essent, alios decem superaddidimus. Ne vero & hoc adhuc minus esset, alios duodecim iungi fecimus. In hoc autem cognoscimus caritatem vestram, quia de nobis ita præsumitis, sicut vos præsumere debetis. Sed per omnipotentem Dominum rogo, vt assiduas preces pro nobis faciatis; quatenus de peccatis in quibus obligatus teneor, & tribulationibus quibus premor, citius absoluar, & patriæ cælestis gaudiis perfruar. Hoc autem quod pro me qualiter oratis, in epistolis vestris indicastis, cognoscite quia valde me releuauit. Sed iam post petitionem meam amplius facite, quam etiam me non petente fecistis. Præfatum vero dilectissimum filium meum Epiphanium diaconum, quia huic ecclesiæ diaconatu interueniente ligauimus, sanctitatem tuam non debet contristare quod sancto Petro apostolorum principi, quia per temetipsum corpore non vales, ei per filium tuum ipse deseruias, & lucro cælestis remunerationis perfruaris. Sancta autem trinitas te sua protectione custodiat, & in præsentis vita eremo a subsequentibus atque obuiantibus hostibus tegat, vt etsi qua sunt vestra præterita peccata relaxet, & ea quæ adhuc ante faciem veniunt, a vobis manu suæ pietatis amoueat. Ipsa te ducat, & ipsa perducat, atque in æterno gaudio ipsa suscipiat. Det tibi ad electorum sortem pertingere, & pro<sup>\* ad. pcc-</sup> peccatis meis, vt absolui merear, orare.

*Mense Iunio, indictione decimatercia.*

EPISTOLA XXXI.

GREGORII PAPÆ I.

AD MAVRICIVM AVGVSTVM.

Conqueritur se fatuum appellatum. Deinde sacerdotes honorandos, exemplo Constantini confirmat. De plagiis quibus affligitur, & de frumentis.

*Gregorius Mauricio Augusto.*

**I**N serenissimis iussionibus suis dominorum pietas dum Ioan. diac.  
lib. 4. c. 16. me de quibusdam redarguere studuit, parcendo mihi  
*Concil. Tom. 13.* Fff ij

minime pepercit. Nam in eis vrbane simplicitatis vocabulo me fatuum appellat. In scriptura etenim sacra cum in bono intelligentia ponitur simplicitas, vigilanti saepe prudentiæ atque rectitudini sociatur. Vnde etiam de beato Iob scriptum est: *Erat vir simplex & rectus.* Et beatus Paulus apostolus admonet, dicens: *Estote simplices in malo, prudentes in bono.* Et per semetipsam admonet Veritas dicens: *Estote prudentes sicut serpentes, & simplices sicut columbae.* Esse valde inutile indicans, si aut simplicitati prudentia, aut prudentiæ simplicitas desit. Ut ergo seruos suos ad cuncta eruditos efficeret, esse eos & simplices sicut columbas, & prudentes ut serpentes voluit: quatenus in eis & serpentis astutia columbae simplicitatem acueret, & columbae simplicitas serpentis astutiam temperaret. Ego igitur, qui in serenissimorum dominorum iussionibus ab Arnulphi astutia deceptus, non adiuncta prudentia simplex denuntior, constat procul dubio quia fatuus appellor: quod ita esse ego quoque ipse confiteor. Nam si hoc vestra pietas taceat, causæ clamant. Ego enim si fatuus non fuissim, ad ista toleranda, quæ inter Longobardorum gladios hoc in loco patior, minime venissem. In ea autem re, quam de Arnulpho perhibui, quia toto corde venire ad rempublicam paratus fuit, dum mihi non creditur, etiam mentitus esse reprehendor. Sed etsi sacerdos non sum, scio grauem esse hanc iniuriam sacerdoti, ut veritati serviens, fallax credatur. Et dudum noui, quoniam Arnulpho plus est creditum quam mihi, Leoni amplius est creditum quam mihi: & nunc eis qui esse ad medium videntur, plus quam meis assertionibus credulitas impenditur. Et quidem si terræ meæ captiuitas per quotidiana momenta non ex cresceret, de despectione mea atque irrisione latutus tacerem. Sed & hoc me vehementer afflit, quia ego vnde crimen falsitatis tolero, inde Italia quotidie ducitur sub Longobardorum iugo captiua. Dumque meis suggestionibus in nullo creditur, vires hostium immaniter excrescunt. Hoc tamen piissimo domino suggero, ut de me mala omnia quælibet existimet, de utilitate vero reipublicæ & causa erectionis Italæ non quibuslibet facile pias aures præbeat, sed plus rebus quam verbis credat. Sacerdotibus autem non ex terrena potestate dominus

*Iob. 1.**Rom. 16.**Matth. 10.*

noster citius indignetur, sed excellenti consideratione, propter eum cuius serui sunt, eis ita dominetur, ut etiam debitam reuerentiam impendat. Nam in diuinis eloquiis aliquando sacerdotes dii, aliquando angeli vocantur. Grat. II. q.  
I. cap. 41.  
Nicol. papa  
ep. 7. ad.  
Mich. imp.

Nam & per Moysen de eo qui ad iuramentum deducen-  
dus est, dicitur: *Applica illum ad deos*, id est ad sacerdotes. Exod. 22.

Et rursus scriptum est: *Diis non detrahes*, scilicet sacerdo-  
Ibidem. tibus. Et propheta ait: *Labia sacerdotis custodiunt scientiam*, Malach. 2.

*legem requirent ex ore eius, quia angelus Domini exercituum est.*

Quid ergo mirum si illos vestra pietas dignetur honorare,

quibus in suo eloquio honorem tribuens, eos aut angelos,

aut deos ipse etiam appellat Deus? Ecclesiastica quoque

testatur historia, quia cum piæ memoriæ Constantino

principi scripto oblatæ accusationes contra episcopos

fuissent, libellos quidem accusationis accepit, & eosdem

qui accusati fuerant episcopos conuocans, in eorum con-

spectu libellos quos acceperat incendit, dicens: *Vos*

*dii estis, a vero Deo constituti. Ite, & inter vos causas vestras dis-*

*cutite, quia dignum non est, ut nos iudicemus deos.* In qua ta-

mensemtentia, pie domine, sibi magis ex humilitate, quam

illis aliquid præstitit ex reuerentia impensa. Ante eum

quippe pagani in republica principes fuerunt, qui verum

Deum nescientes, deos ligneos & lapideos colebant, &

tamen eorum sacerdotibus honorem maximum tribue-

bant. Quid ergo mirum, si Christianus imperator veri

Dei sacerdotes dignetur honorare, dum pagani, ut prædi-

ximus, principes honorem impendere sacerdotibus no-

uerunt, qui diis ligneis & lapideis seruiebant? Hæc ergo

pietati dominorum non pro me, sed pro cunctis sacerdoti-

bus suggero. Ego enim homo peccator sum. Et quia om-

nipotenti Deo incessanter quotidie delinquo, aliquid mi-

hi apud tremendum examen illius esse remedium suspi-

cor, si incessantibus quotidie plagis ferio. Et credo quia

eudem omnipotentem Dominum tanto vobis amplius

placatis, quanto me ei male seruientem distictius affligi-

tis. Multas enim iam plagas acceperam, & superuenienti-

bus dominorum iussionibus inueni consolationes quas

non sperabam. Si enim possum, has celeriter plagas enu-

mero. Primum, quod mihi pax subducta est, quam cum

Longobardis in Tuscia positis sine vlo reipublicæ dispen-

Fff iii

dio feceram. Deinde corrupta pace, de Romana ciuitate milites ablati sunt. Et quidem alii ab hostibus occisi, alii vero Narniis & Perusii positi, & vt Perusium teneretur, Roma relicta est. Post hoc plaga grauior fuit aduentus Agilulphi, ita vt oculis meis cernerem Romanos more canum in collis funibus ligatos, qui ad Franciam ducebantur venales. Et quia nos qui intra ciuitatem fuimus, Deo protegente, manus eius euasimus; quæsitum est vnde culpabiles esse videremur, videlicet, cur frumenta defuerint, quæ in hac vrbe diu multa seruari nullatenus possunt, sicut in alia suggestione plenius indicaui. Et quidem de memet ipso in nullo turbatus sum, quia, teste conscientia fateor, aduersa quælibet pati paratus sum, dummodo hæc omnia cum salute dumtaxat meæ animæ euadam. Sed de glorio-  
sis viris Gregorio præfecto, & Castorio magistro mili-  
tum non mediocriter sum afflictus: qui & omnia quæ po-  
tuerunt fieri nullo modo facere neglexerunt, & labo-  
res vigiliarum, & custodiæ ciuitatis, in eadem obfessione  
vehementissimos pertulerunt, & post hæc omnia graui  
dominorum indignatione percussi sunt. De quibus paten-  
ter intelligo, quia eos non sua æta, sed mea persona gra-  
uat. Cum qua, quia pariter in tribulatione laborauerant,  
post laborem pariter tribulantur. Quod autem domino-  
rum pietas illud mihi pauendum & terribile omnipoten-  
tis Dei iudicium intentat, rogo per eumdem omnipoten-  
tem Dominū, ne hoc ulterius quidem faciat. Nam adhuc  
nescimus, quis ibi qualis sit. Et Paulus egregius prædicator ait: *Nolite iudicare ante tempus, donec veniat Dominus, qui & illuminabit abscondita tenebrarum, & manifestabit consilia cordium.* Hoc tamen breuiter dico, quoniam indignus & peccator plus de venientis Iesu misericordia quam de ve-  
stræ pietatis iustitia præsumo. Et sunt multa quæ de iudi-  
cio illius homines ignorant, quia fortasse quæ vos laudatis,  
ille reprehendet: & quæ vos reprehenditis, ille laudabit.  
Inter hæc ergo omnia incerta, ad solas lacrymas redeo, pe-  
tens vt idem omnipotens Deus piissimum Dominum no-  
strum, & sua hic manu regat, & in illo terribili iudicio libe-  
rum ab omnibus delictis inueniat. Et me ita placere, si ne-  
cessè est, hominibus faciat, vt æternam eius gratiam non  
offendam.

1. Cor. 4.

## EPISTOLA XXXII.

GREGORII PAPÆ I.

AD EVM DEM.

De Ioanne episcopo Constantinopolitano, qui sibi  
vniuersalis nomen arripuit.

*Gregorius Mauricio Augusto.*

**P**IASSIMVS atque a Deo constitutus dominus noster, in-  
ter ceteras augustorum ponderum curas, conseruan-<sup>Ioan. diac.  
lib. 3. cap.  
si.</sup>  
dæ quoque sacerdotali caritati rectitudine studii spiritalis  
inuigilat: videlicet pie veraciterque considerans, nem-  
inem posse recte terrena regere, nisi nouerit diuina tracta-  
re, pacemque reipublicæ ex vniuersalibus ecclesiæ pace pen-  
dere. Quæ enim, serenissime domine, virtus humana,  
quodque carnei robur brachii contra vestri Christianissi-  
mi culmen imperii irreligiosas præsumeret manus erige-  
re, si studeret concors sacerdotum mens redemptorem  
suum lingua pro vobis atque ut oportebat meritis exora-  
re? Aut quis ferociissimæ gentis gladius in necem fidelium  
tanta crudelitate grassaretur, nisi nostra vita, qui sacerdo-  
tes nominamur, & non sumus, a prauissimis grauaretur  
operibus? Sed dum nos competentia nobis relinquimus,  
& nobis incompetentia cogitamus, peccata nostra barba-  
ricis viribus sociamus, & culpa nostra hostium gladios ex-  
acuit, quæ reipublicæ vires grauat. Quid autem dicturi su-  
mus, qui populum Dei, cui indigne præsumus, peccato-  
rum nostrorum oneribus premimus? qui quod per lin-  
guam prædicamus, per exempla destruimus? qui iniqua  
docemus operibus, & sola voce ea quæ sunt iusta præten-  
dimus? Offsa ieuniis atteruntur, & mente turgemus. Cor-  
pus despctis vestibus tegitur, & elatione cordis purpu-  
ram superamus. Iacemus in cinere, & excelsa non despici-  
mus. Doctores humilium, duces superbiæ, ouina facie lu-  
pinos dentes abscondimus. Sed quis horum finis est, nisi  
quod hominibus suademus, Deo autem manifesti sumus?  
Quamobrem prouidentissime piissimus dominus noster  
ad compescendos bellicos motus pacem querit ecclesiæ,  
atque ad huius compagem sacerdotum dignatur corda re-  
ducere. Quod quidem ego opto, atque quantum ad me

attinet, serenissimis iussionibus obedientiam præbeo. Quia vero non causa mea, sed Dei est: & quia non solus ego, sed tota turbatur ecclesia, quia piæ leges, quia veneranda Synodi, quia ipsa Domini nostri Iesu Christi mandata superbi atque pompatici cuiusdam sermonis inuentione turbantur; piissimus dominus locum fecet vulneris, atque resistentem ægrum Augustæ auctoritatis vinculis constringat. Adstringendo enim, statū reipublicæ subleuatis: & dum talia reciditis, de regni vestri prolixitate tractatis. Cunctis ergo euangelium scientibus liquet, quod voce dominica sancto & omnium apostolorum Petro principi apostolo totius ecclesiæ cura commissa est; ipsi quippe dicitur: Petre, amas me? pasce oves meas. Ipsi dicitur: Ecce satanas expetit cibrare vos sicut triticum, & ego pro te rogaui, Petre, ut non deficiat fides tua: & tu aliquando conuersus confirma fratres tuos. Ipsi dicitur: Tu es Petrus, & super hanc petram ædificabo ecclesiam meam, & portæ inferi non præualebunt aduersus eam. Et tibi dabo claves regni celorum: & quocumque ligaueris super terram, erit ligatum & in celis: & quocumque solueris super terram, erit solutum & in celis. Ecce claves regni cœlestis accipit, potestas ei ligandi ac soluendi tribuitur, cura ei totius ecclesiæ & principatus committitur, & tamen vniuersalis apostolus non vocatur: & vir sanctissimus consacerdos meus Ioannes vocari vniuersalis episcopus conatur. Exclamare compellor ac dicere: O tempora, o mores! Ecce cuncta in Europæ partibus barbarorum iuri sunt tradita, destructæ vrbes, euersa castra, depopulatae prouinciae, nullus terram cultor inhabitat, saeuient & dominantur quotidie in necem fidelium cultores idolorum, & tamen sacerdotes, qui in pauimento & cinere flentes iacere debuerunt, vanitatis sibi nomina expetunt, & nouis ac profanis vocabulis gloriantur. Numquid ego hac in re, piissime domine, propriam causam defendo? Numquid specialem iniuriam vindico? & non magis causam omnipotentis Dei, & causam vniuersalis ecclesiæ? Quis est iste, qui contra statuta euangelica, contra Canonum decreta, nouum sibi usurpare nomen præsumit? Vtinam vel sine aliorum imminutione unus sit, qui vocari appetit vniuersalis. Et certe multos Constantinopolitanæ ecclesiæ in haereseos voragine incidiisse nouimus sacerdotes, & non solum haereticos, sed etiam

*Ioan. 21.  
Luc. 22.  
Matth. 16.*

etiam hæresiarchas factos. Inde quippe Nestorius, qui mediatorem Dei & hominum Iesum Christum duas esse personas existimans, quia Deum fieri hominem potuisse non credidit, usque ad Iudaicam perfidiam erupit. Inde Macedonius, qui consubstantialem Patri & Filio Spiritum sanctum Deum esse denegavit. Si igitur illud nomen in ea ecclesia sibi quisquam arripuit, quod apud bonorum omnium iudicium fuit, vniuersa ergo ecclesia, quod absit, a statu suo corruit, quando is qui appellatur vniuersalis cadit. Sed absit a cordibus Christianorum nomen istud blasphemiae, in quo omnium sacerdotum honor adimitur, dum ab uno sibi dementer arrogatur. Certe pro beati Petri apostolorum principis honore, per venerandam Calchedonensem Synodum Romano pontifici oblatum est: sed nullus eorum vniquam hoc singularitatis nomen assumpsit, nec vocabulo uti consensit, ne, dum priuatum aliquid daretur vni, honore debito sacerdotes priuarentur vniuersi. Quid est ergo quod nos huius vocabuli gloriam & oblatam non querimus, & alter sibi hanc arripere etiam non oblatam presumit? Ille ergo magis est piissimum dominorum præceptione flectendus, qui præceptis canonicis obedientiam præbere contemnit. Ille coercendus est, qui sanctæ vniuersali ecclesiæ iniuriam facit, qui corde tumet, qui gaudere de nomine singularitatis appetit, qui honori quoque imperii vestri se per priuatum vocabulum superponit. Ecce omnes hac de re scandalum patimur. Ad vitam ergo rectam reuertatur auctor scandali, & omnia sacerdotum iurgia cessabunt. Ego enim cunctorum sacerdotum seruus sum, in quantum ipsi sacerdotaliter viuunt. Nam qui contra omnipotentem Dominum per inanis gloriae tumorem atque contra statuta patrum suam ceruicem erigit, in omnipotenti Domino confido, quia meam sibi nec cum gladiis flectit. Quid autem nuper in hac urbe ex huius auditu vocabuli gestum sit, Sabiniano diacono ac responsali meo subtilius indicaui. Cogitet ergo dominorum pietas de me proprio suo, quem specialiter præ ceteris semper fuit atque continuit, qui & vobis obedientiam præbere desidero, & tamen de mea negligentia reperi reus in superno tremendoque iudicio pertimesco. Ac secundum petitionem prædicti Sabiniani diaconi, aut piis-

*Concil. Tom. 13.*

Ggg

simus dominus ipsum dignetur iudicare negotium, aut  
sæpe nominatum virum vt ab hac tandem intentione cef-  
set deflectere. Si ergo iudicio pietatis vestræ iustissimo, vel  
clementibus admonitionibus cesserit, omnipotenti Deo  
gratias referimus, atque de concessa per vos omni ecclesiæ  
pace gaudemus. Sin autem in eadem diutius contentione  
perstiterit, hac de re iam veritatis sententiam certam tene-

*Luce 14. & 18.* mus, quæ ait: *Omnis qui se exaltat humiliabitur.* Et rursus scrip-  
tum est: *Ante ruinam exaltabitur cor.*

*Pron. 16.* Ego autem domino-  
rum iussionibus obedientiam præbens, prædicto consa-  
cerdoti meo & dulciter scripsi, & humiliter, vt ab hac ina-  
nis gloriæ appetitione sese emendet admonui. Si igitur me  
audire voluerit, habet deuotum fratrem: si vero in super-  
bia persistit, iam quid assequatur aspicio, quia illum sibi ad-  
uersarium inuenit, de quo scriptum est: *Deus superbis refi-  
st, humiliibus autem dat gratiam.*

*Iac. 4.*

## EPISTOLA XXXIII.

## GREGORII PAPÆ I.

AD CONSTANTINAM AVGVSTAM.

De peruersitate iudicii in Sardinia, Corsica, &amp; Sicilia.

*Gregorius Constantinæ Augustæ.*

*Grat. 11. q.  
1. cap. 8.  
Iuo p. 13. c.  
36.*

**C**V M serenissimam dominam sciam de cælesti patria  
atque animæ sua vita cogitare, culpam me committe-  
re vehementer existimo, si ea quæ pro timore omnipoten-  
tis domini sunt suggesta siluero. Dum in Sardinia insu-  
la multos esse gentiles cognouissem, eosque adhuc prauæ  
gentilitatis more idolorum sacrificiis deseruire, & eius-  
dem insulæ sacerdotes ad prædicandum Redemptorem  
nostrum torpentes existere, vnum illuc ex Italia episco-  
pis misi, qui multos gentilium ad fidem domino-coope-  
rante conuertit. Sed quidam rem mihi sacrilegam nuntia-  
uit: quia hi qui in ea idolis immolant, iudici præmium  
persoluunt, vt eis hoc facere liceat. Quorum dum qui-  
dam baptizati essent, & immolare iam idolis desiuissent,  
adhuc ab eodem insulæ iudice etiam post baptismum præ-  
mium illud exigitur, quod dare prius pro idolorum im-  
molatione confueuerant. Quem cum prædictus episcopus  
increparet, tantum se suffragium promisisse respondit,

vt nisi de causis etiam talibus impleri non possit. Corsica vero insula tanta nimietate exigentium, & grauamine premitur exactiōnum, vt ipsi qui in illa sunt, eadem quae exigitur completere vix filios suos vendendo sufficient. Vnde fit vt, derelicta pia republica, possessores eiusdem insulae ad nefandissimam Longobardorum gentem cogantur effugere. Quid enim grauius, quid crudelius a barbaris pati posunt, quam vt constricti atque compressi suos vendere filios compellantur? In Sicilia autem insula Stephanus quidam marinārum partium chartularius, tanta præiudicia, tantasque oppрessiones operari dicitur, inuadendo loca singulorum, atque sine dictione causarum per possessio-nes ac domos titulos ponendo, vt si velim acta eius singula quae ad me peruenierunt dicere, magno volumine hæc ex-plere non possim. Quæ omnia serenissima domina solerter aspiciat, & oppressorum gemitus compescat: hæc enim ego ad piissimas aures vestras peruenisse non suspicor. Nam si peruenire potuissent, nuncusque minime perman-issent. Quæ piissimo domino apto sunt tempore sugge-renda, vt ab anima sua, ab imperio atque a filiis suis tale hoc tantumque facinus peccatiique pondus amoueat. Qui scio quoniam dicturus est, quia nobis in Italiæ expensis transmittitur quidquid de prædictis insulis aggregatur. Sed ego suggero ad hoc, vt etsi minus expensæ in Italia tri-buantur, a suo tamen imperio oppressoru<sup>m</sup>\* lacrymas com-pescat. Nam & idcirco fortasse tantæ expensæ in hac ter-ra minus ad utilitatem proficiunt, quia cum peccati aliqua admixtione colliguntur. Præcipiant ergo serenissimi domi-ni, nihil cum peccato colligi. Nam scio quia etsi paru<sup>r</sup> rei-publicæ attribuitur utilitatibus, ex eo multum respublica adiuuatur. Quod etsi fortasse contingat expensis minoribus minus adiuuari, melius est tamen temporaliter nos non viuere, quam vos ad æternam vitam obstatulum ali-quod inuenire. Quæ enim mentes, qualia viscera paren-tum esse possunt, perpendite, quando filios suos distrahabunt ne torqueantur? Qualiter autem miserendum sit filiis aliorum, hoc bene sciunt qui habent proprios. Vnde mihi hæc breuiter suggestisse sufficiat, ne si ea quæ in his parti-bus aguntur pietas veltra non cognosceret, me apud di-strictum iudicem silentii mei culpa mulctaret.

\* ad cala-mitates

Concil. Tom. 13.

Ggg ij

## EPISTOLA XXXIV.

## GREGORII PAPÆ I.

AD EAMDEM.

De superbia Ioannis episcopi, & de Maximo  
præuaricatore.*Gregorius Constantinæ Augustæ.*

**O**MNIPOTENS Deus, qui pietatis vestræ cor suæ dexteræ maiestatis tenet, & nos ex vobis protegit, & vobis pro temporalibus actibus æterna præmia remunerationis parat. Nam Sabiniano diacono responsali meo scribente cognoui in causis beati Petri apostolorum principis contra quosdam superbos, humiles facie tenuis & blandos, quanta se iustitia vestra serenitas impendat. Et in Redemptoris nostri largitate confido, quia bonum hoc in serenissimo domino & piissimis filiis in cælestis quoque patriæ retributione recipietis. Nec dubium est peccatorum vinculis solutis, æterna vos bona recipere, quæ in causis eius ecclesiæ ipsum vobis, cui potestas ligandi & soluendi data est, debitorem fecistis. Vnde adhuc peto, ut nullius præualere contra veritatem hypocrisim permittatis: quia sunt quidam qui, iuxta egregii prædicatoris vocem, *per dulces sermones & benedictiones seducunt corda innocentium*, qui ueste quidem despecti sunt, sed corde tument: & quasi in hoc mundo cuncta despiciunt, sed tamen ea quæ mundi sunt simul cuncta adipisci querunt: qui indigosse omnibus hominibus fatentur, sed priuatis vocabulis contenti esse non possunt; quia illud appetunt, vnde omnibus digniores esse videantur. Vestra itaque pietas, quam omnipotens Deus cum serenissimo domino vniuerso mundo præesse constituit, illi per fauorem iustitiae formulatum suum reddat; a quo ius tantæ potestatis accepit, ut quanto verius in executione veritatis auctor omnia seruit, tanto securius commisso sibi mundo dominetur. Præterea indico, quia piissimi domini scripta suscepi, ut cum fratre & consacerdote meo Ioanne debeam esse pacificus. Et quidem sic religiosum dominum decuit, ut ista præciperet sacerdotibus. Sed cum se noua præsumptione atque superbia idem frater meus vniuersalem

Rom. 16.

episcopum appellat, ita ut sanctæ memorie decessoris mei tempore adscribi se in Synodo tali hoc superbo vocabulo faceret, quamuis cuncta acta illius Synodi sede contradicente apostolica soluta sint; triste mihi aliquid serenissimus dominus innuit, quod non eum corripuit, qui superbit, sed magis ab intentione mea declinare studuit, qui in hac causa euangeliorum & Canonum statuta humilitatis atque rectitudinis virtute defendo. Quia in re a prædicto fratre & consacerdote meo contra euangelicam sententiam, contra beatum quoque Petrum apostolum, & contra omnes ecclesias, contraque Canonum statuta agitur. Sed est omnipotens Dominus, in cuius manu sunt omnia, de quo scriptum est: *Non est sapientia, non est prudenter Pro. 21.*  
*tia, non est consilium contra Dominum.* Et quidem saepetatus sanctissimus frater serenissimo domino multa suadere conatur: sed bene noui, quia tantæ illæ orationes eius & lacrymæ nil ei a quoquam contra rationem aut animam suam surripi permittunt. Triste tamen valde est, ut patienter feratur quatenus despectis omnibus prædictus frater & coepiscopus meus solus conetur appellari episcopus. Sed in hac eius superbia quid aliud nisi propinquia iam Antichristi esse tempora designatur? Quia illum videlicet imitatur, qui spretis in sociali gaudio angelorum legionibus ad culmen conatus est singularitatis erumpere, dicens:  
*Super astra cœli exaltabo solium meum, sedebo in monte testamen- Ia. 14.*  
*ti, in lateribus Aquilonis, & ascendam super altitudinem nubium, & ero similis Altissimo.* Vnde per omnipotentem Dominum rogo, ne pietatis vestræ tempora permittatis vnius hominis elatione maculari, neque tam peruerso vocabulo ullum quoquo modo præbeatis assensum, atque hac in causa nequaquam me pietas vestra despiciat; quia etsi peccata Gregorii tanta sunt, ut pati talia debeat, Petri tamen apostoli peccata nulla sunt, ut vestris temporibus pati ista mereatur. Vnde iterum atque iterum per omnipotentem Dominum rogo, ut sicut parentes priores vestri principes sancti Petri apostoli gratiam quæsierunt, ita vos quoque & hanc vobis querere, & conseruare curetis, & propter peccata nostra, qui ei indigne seruimus, eius apud vos honor nullatenus minuatur, qui & modo vobis adiutor esse in omnibus, & postmodum vestra valeat peccata dimit-

Ggg iij

tere. Viginti autem iam & septem annos ducimus, quod in hac vrbe inter Longobardorum gladios viuimus. Quibus quam multa hac ab ecclesia quotidianis diebus erogantur, vt inter eos viuere possimus, sugerenda non sunt. Sed breuiter indico, quia sicut in Rauennæ partibus dominorum pietas apud primum exercitum Italiæ facellarium habet, qui causis superuenientibus quotidianas expensas faciat, ita & in hac vrbe in causis talibus eorum facellarius ego sum. Et tamen hæc ecclesia, quæ vno eodemque tempore clericis, monasteriis, pauperibus, populo, atque insuper Longobardis tam multa indefinenter expendit, ecce adhuc ex omnium ecclesiarum premitur afflictione, quæ de hac vnius hominis superbia multum gemunt, et si nihil dicere præsumunt. Salonitanæ vero ciuitatis episcopus me ac responsali meo nesciente ordinatus est, & facta res est quæ sub nullis anterioribus principibus euenit. Quod ego audiens, ad eumdem præuaricatorem, qui inordinate ordinatus est, protinus misi, vt omnino Missarum solennia celebrare nullo modo præsumeret, nisi prius a serenissimis dominis cognoscerem, si hoc fieri ipso iussissent quod ei sub excommunicationis interpositione mandaui. Et contempto me atque despecto, in audaciam quorundam sacerdotalium hominum, quibus denudatasua ecclesia præmia multa præbere dicitur, nuncusque Missas facere præsumit, atque ad me venire secundum iussionem dominorum noluit. Ego autem præceptioni pietatis eorum obediens, eidem Maximo, qui me nesciente ordinatus est, hoc quod in ordinatione sua me vel responsalem meum prætermittere præsumpsit, ita ex corde laxaui, ac si me auctore fuisset ordinatus. Alia vero peruersa illius, scilicet mala corporalia, quæ cognoui, vel quia cum pecuniis est electus, vel quia excommunicatus Missas facere præsumpsit, propter Deum irrequisita præterire non possum. Sed opto, & Dominum deprecor, quatenus nihil in eo de his quæ dicta sunt valeat inueniri, & sine periculo animæ meæ causa ipsius terminetur. Prius tamen quam hæc cognoscantur, serenissimus dominus discurrente iussione præcepit, vt eum venientem cum honore suscipiam. Et valde graue est, vt vir de quo tanta & talia nuntiantur, cum ante requiri & discuti debeat, honore-

EPISTOLARVM LIBRI IV. 423

tur. Et si episcoporum causæ mihi commissorum apud piissimos dominos aliorū patrocinii disponuntur, infelix ego in ecclesia ista quid facio? Sed ut episcopi mei me despiciant, & contra me refugium ad sacerdtales iudices habent, omnipotenti Deo gratias ago, peccatis meis deputo. Hoc tamen breuiter suggero, quia aliquantulum expecto: & si ad me diu venire distulerit, in eo exercere distinctionem canonicam nullo modo cessabo. In omnipotenti autem Domino confido, quia longam piissimis dominis vitam tribuet, & de nobis sub manu vestra non secundum peccata nostra, sed secundum gratiæ suæ dona disponet. Hæc ergo tranquillissimæ dominæ suggero, quia integerrima serenitatis eius conscientia quanto moueatur zelo rectitudinis, atque iustitiae, non ignoro.

EPISTOLA XXXV.

G R E G O R I I P A P Æ I.

AD SEBASTIANVM EPISCOPVM RHIZINIENSEM.

De malitia Romani, & Bonifacio defensore.

*Gregorius Sebastiano episcopo Rhiziniensi.*

**D**ULCISSIMA atque suauissima fraternitatis tuæ scripta suscepi: quæ mihi, quamuis nunquam desit a corde, sanctitatem tamen vestram quasi corporaliter præsentem fecerunt. Sed omnipotentem Dominum rogo, ut sua vos dextera protegat, nobisque & hic tranquillam vitam, & quando ei placuerit præmia æterna concedat. Sed peto, si illo me amore diligitis, quo præsentem semper amastis, ut pro me enixius exoretis; quatenus omnipotens Deus a peccatorum meorum nexibus me citius soluat, & corruptionis huius pondere exutum suo conspectui liberū existere faciat. Quamuis enim inæstimabilis sit cælestis patriæ dulcedo, quæ trahat, multi tamen in hac vita dolores sunt, qui ad amorem cælestium quotidie impellant. Qui mihi in hoc ipso solum vehementer placent, quia placere in hoc mundo aliquid non permittunt. Quæ enim, frater sanctissime, de amici vestri domni Romani persona in hac terra patimur loqui minime valemus. Breuiter tamen dico, quia eius in nos malitia gladios Longobardorum vicit, ita ut benigniores videantur hostes, qui nos interimunt,

quam reipublicæ iudices, qui nos malitia sua, rapinis atque fallaciis in cogitatione consumunt. Et uno tempore curam episcoporum atque clericorum, monasteriorum quoque & populi gerere, contra hostium infidias sollicitum vigilare, contra ducum fallacias atque malitias suspectum semper existere, cuius laboris, cuius doloris sit, vestra fraternitas tanto verius penset, quanto me qui hæc patior purius amat. Præterea debitum salutationis allocutum soluens, indico quod ad me Bonifacio defensore referente peruenierit, quia vir sanctissimus frater noster dominus Anastasius patriarcha in vna suarum ciuitatum regendam vobis ecclesiam committere voluit, & consentire noluistis. Quem sensum ac sapientiam vestram valde ego libenter amplexus sum, laudaui vehementer, & vos felices, me infelicem esse deputauit, qui hoc tali tempore regimen ecclesiæ fuscipere consensi. Si tamen animus vester fortasse fratribus condescendendo, & misericordiæ operibus intentus, ad hoc vñquam consentire decreuerit, peto vt amori meo alium minime præponatis. Sunt enim in Sicilia insula ecclesiæ vacantes episcopis, & si vobis placet auctore Deo ecclesiam regere, iuxta beati Petri apostoli limina, cum eius adiutorio melius potestis. Si vero non placet, feliciter insta, vt ista in vobis intentio permaneat, & pro nobis infelicibus exora. Omnipotens autem Deus in quocumque vos esse loco voluerit, sua proteccione custodiat, & ad cælestia vos dona perducat.

## EPISTOLA XXXVI.

## GREGORII PAPÆ I.

AD EVLOGIVM ET ANASTASIVM EPISCOPOS.

Vt communiter insequantur superbiam Ioannis episcopi,  
qui nomen vniuersalis sibi arrogabat.

*Gregorius Eulogio episcopo Alexandrino, & Anastasio  
episcopo Antiocheno.*

Ioan. diac.  
lib. 4. cap. 1.  
Rom. 11.  
1. Thess. 2.

DVM prædictor egregius dicat : *Quamdiu quidem sum gentium apostolus, ministerium meum honorificabo : qui rurus alias dicens: Factis sumus ut paruuli in medio vestrum: exemplum procul dubio nobis sequentibus ostendit, vt & humilitatem teneamus in mente, & tamen ordinis nostri digni-*

dignitatem seruemus in honore, quatenus nec in nobis humilitas timida, nec erectio sit superba. Ante hos siquidem annos octo, sanctæ memoriaedecessoris mei Pelagii tempore, frater & coepiscopus noster Ioannes in Constantiopolitana vrbe ex causa alia occasionem quærens Synodum fecit, in qua se vniuersalem appellare conatus est. Quod mox idemdecessor meus ut agnouit, directis literis ex auctoritate sancti Petri apostoli eiusdem Synodi acta cassauit. Quarum videlicet epistolarum sanctitati vestræ exemplaria studui destinare. Diaconum vero, qui iuxta morem pro responsis ecclesiæ faciendis piissimorum dominorum vestigiis adhærebat, cum præfato confacere nostro Missarum solennia celebrare prohibuit. Cuius ego quoque sententiam sequens, similia prædicto confacero nostro scripta transmisi, quorum exemplaria vestræ beatitudini censui transmittenda; hoc præcipue intendens, ut hac de re, qua ex noua superbia tota vniuersalis ecclesiæ viscera perturbantur, prius saepetati fratris nostri animum modesta intentione pulsémus. Qui si nequaquam a suæ elationis rigore voluerit inclinari, tunc quid fieri debeat, cum omnipotentis Dei solatio subtilius pertractetur. Sicut enim veneranda mihi vestra sanctitas nouit, vni per sanctam Calchedonensem Synodum pontifici sedis apostolicæ, cui Deo disponente deseruio, hoc vniuersitatis nomen oblatum est. Sed nullus vñquam decessorum meorum hoc tam profano vocabulo vti consensit; quia videlicet si unus patriarcha vniuersalis dicitur, patriarcharum nomen ceteris derogatur. Sed absit hoc, absit a Christiana mente id sibi velle quempiam arripare, vnde fratrum suorum honorem imminuere ex quantumcumque parte videatur. Cum ergo nos hunc honorem nolumus oblatum suscipere, pensate quam ignominiosum sit hunc sibi quempiam violenter usurpare voluisse. Propterea sanctitas vestra in suis epistolis neminem vñquam vniuersalem nominet, ne sibi debitum detrahatur, cum alteri honorem offert indebitum. Nec hac in re de serenissimis dominis animum vestrum mordeat sinistra suspicio, quia omnipotentem Dominum metuit, & contra statuta euangelica, contra sacratissimos Canones agere aliquid nullo modo consentit. Ego vero quamuis a

*Concil. Tom. 13.*

H h h

vobis per longa terrarum atque maris spatia disiunctus  
sim, sum tamen omnino vobis corde coniunctus. Idque

de vestra beatitudine erga me modis omnibus confido;  
quia cum me vicissim diligitis, a me non longe estis. Et

*Matth. 15.*

magis gratias referimus grano illi finapis; quia ex modici  
despicabilisque seminis specie ita estra mis ex eadem radice  
surgentibus, atque se distendentibus usquequa dif-  
fusus, ut in eis volatilia cœli cuncta nidificant. Gratia que sit

*Ibidem.*

fermento illi, quo tribus farinæ satis totius humani gene-  
ris massam in unitate conspersit: atque paruo lapidi, qui  
abscissus de monte sine manibus occupauit uniuersam fa-  
ciem orbis terræ: qui ad hoc se usquequa distendit, ut

ex omni humano genere in unitate redacto totius corpus  
perficeretur ecclesiæ; atque ita ad totius compaginis per-  
tineret commodum, membrorum partialis ista distinctio.  
Vnde nos quoque a vobis non longe sumus; quia in illo

*Eph. 4.*

qui bique est unum sumus. Agamus ergo ei gratias, qui so-  
lutiis inimicitiis, in carne sua fecit, ut in omni orbe terrarū  
onus esset grex, & unum ouile sub se uno pastore; memo-

*Heb. 12.*

res semper quid nos prædicator Veritatis admoneat, di-  
cens: *Sollicituare unitatem Spiritus in vinculo pacis.* Et: *Pa-*

*Rom. 12.*

*cem secundum amini cum omnibus & sanctimoniam, sine qua nemo vide-*

*bit Deum.* Qui aliis quoque discipulis dicit: *Si fieri potest, quod*  
*ex vobis est, cum omnibus hominibus pacem habentes.* Vedit enim

pacem bonos cum malis habere non posse; & idcirco, sicut  
nolitis, præmisit, *si fieri potest.* Sed quia pax nisi in duabus

partibus firmari non valet, cum hanc mali fugiunt, boni  
tenere medullitus debent. Vnde & mire dicitur: *Quod*  
*ex vobis est;* ut videlicet in nobis maneat, etiam cum

a prauorum hominum mente repellitur. *Quam* videlicet  
pacem tunc veraciter tenemus, cum superborum  
culpas caritate simul & iustitia insistente prosequimur,

cum eos diligimus, & eorum vitia odio habemus. Opus  
quippe Dei homo est, sed opus hominis vitium. Nos  
ergo discernamus quid Deus, quid item homo fece-

rit; & neque propter errorem odio habeamus homi-  
nem, neque propter hominem diligamus errorem. Uni-

ta ergo mente insequamur in homine malum superbiam,  
ut ab hoste suo, videlicet errore, prius ipse homo libe-

retur. Præstabit vires omnipotens Redemptor noster ca-

ritati atque iustitiae, præstabit nobis longe a nobis positis unitatem Spiritus sui, ipse cuius artificio quasi in arcae modum quatuor mundi construeta lateribus; atque imputribilium lignorum compage, & bitumine caritatis adstricta, nullius aduersitate spiritus, nullius venientis extrinsecus tumore fluctus perturbetur ecclesia. Sed quemadmodum illius gubernante gratia petendum est, ut nullanos superueniens exterius vnda conturbet, ita ex totis orandum est visceribus, fratres carissimi, ut suæ prouidentiæ dextera cumulum sentinæ in nobis interioris exhau-  
riat. Aduersarius quippe diabolus qui contra humiles sæ-  
uiens, sicut leo rugiens circuit quem deuoret, non iam, ut cernimus, caulas circuit, sed ita valide in quibusdam ec-  
clesiarum necessariis membris dentes figit, ut nulli sit dubium, quia nisi vnanimiter fauente Domino cunctorum prouida pastorum turba concurrat, omne, quod absit, citius ouile dilaniat. Perpendite, fratres carissimi, quid e vicino subsequitur, cuius & in sacerdotibus erumpunt tam peruersa primordia. Quia enim iuxta est ille de quo scri-  
ptum est: *Ipsæ est rex super vniuersos filios superbiae*, quod non sine graui dolore dicere compellor, frater & coepisco-  
pus noster Ioannes mandata dominica, apostolica præ-  
cepta, regulas patrum despiciens, eum per elationem præcurrere conatur in nomine. Vestræ autem beatitudini indicet omnipotens Deus, quam graui considerationis huius gemitu torqueor, quod ille quondam mihi mode-  
stissimus, ille omnibus dilectus, ille qui in eleemosynis, orationibus atque ieuniis videbatur occupatus, ex eo in quo sedebat cinere, ex ea quam prætendebat humiliitate, iactantiam sumpsit, ita ut vniuersa sibi tentet adscribere, & omnia quæ soli vni capiti coharent, vide-  
licet Christo, per elationem pompatici sermonis eiusdem Christi sibi studeat membra subiugare. Nec mirum, quod ille tentator qui initium omnis peccati scit esse superbiam, & tunc ea in primo homine ante omnia usus est, & nunc eam quibusdam hominibus ponit in fine virtutum, ut qui aliquatenus bonis vitæ studiis eius videbantur crudelissimas manus effugere, eis in ipsa meta boni operis, & in ipsa quodammodo apponat perfectionis conclusione tendiculum. Vnde magnopere

*Concil. Tom. 13.*

*1. Pet. 5.*

*Iob. 41.*

Hhh ij

orandum est, & omnipotens Deus assiduis precibus implorandus, vt hunc a mente illius auertat errorem, hoc ab vnitate atque humilitate ecclesiæ malum superbiae, & confusionis amoueat. Et fauente Domino omnibus viribus concurrendum atque prouidendum, ne in vniuerso sermonis viuentia in Christi corpore membra moriantur. Si enim hoc dici licenter permittitur, honor patriarcharum omnium negatur. Et cum fortasse is in errore perit, qui vniuersalis dicitur, nullus iam episcopus remansisse in statu veritatis inuenitur. Obtestor ergo vt constanter ac sine praetudicio seruetis sicut accepistis ecclesias, & nihil sibi in vobis haec tentatio diabolicae usurpationis adscribat. State fortes, state securi, scriptaque cum vniuersalis nominis falsitate nec dare vnuquam, nec suscipere presumatis. Omnes episcopos curæ vestrae subiectos ab huius elationis inquinatione prohibete, vt vniuersæ vos ecclesiæ patriarchas non solum in bonis operibus, sed etiam in veritatis auctoritate cognoscant. Si qua autem forsan aduersa subsequuntur, vnanimiter persistentes, etiam moriendo debemus ostendere, quia in damnando generalitatis nomine nostrum specialiter aliquid non amamus. Dicamus cum Paulo : *Mibi vivere Christus est, & mori lucrum.*

*Philipp. 1.  
1. Pet. 3.*

Audiamus quod primus omnium pastorum dicit: *Si quid patiamini propter iustitiam, beati eritis.* Mihi enim credite, quia honorem, quem pro praedicanda veritate suscepimus, si necessitatis causa exigat, securius pro eadem veritate relinquimus quam tenemus. Pro me autem, sicut vestram carissimam beatitudinem decet, orate; vt hoc quod vobis loquiaudeo, operibus ostendam.

## EPISTOLA XXXVII.

## GREGORII PAPÆ I.

AD ANASTASIVM EPISCOPVM ANTIOCHENVM.

Congratulatur de reuersione eius.

*Gregorius Anastasio episcopo Antiocheno.*

LUG. 2.

**G**LORIA in excelsis Deo, & in terra pax hominibus bona voluntatis: quia magnus ille fluuius, qui quondamarentia Antiochiae saxa reliquerat, tandem ad proprium alueum reuersus, & subiectas & iuxta positas valles rigat, vt

& vnum tricesimum, & aliud sexagesimum, aliud vero centesimum fructum ferat. Iam nunc dubium non est, multos in eius vallibus animarum flores excrescere, eosque ad maturos usque fructus per linguæ vestræ fluenta peruenire. Vnde omnipotenti Deo debitam laudem cordis atque oris vocibus ex omnibus medullis reddimus, & in vestra beatitudine non vobis tantummodo, sed omnibus qui vobis subiacent, congaudemus. Suscepi vero epistolas dulcissimæ mihi atque suauissimæ sanctitatis vestræ, ipsum, ut ita dicam, labore \* fudantes. Et quidem scio, quod post illa quietis culmina, in quibus secreta cælestia cordis tangeras manu, graue valde sit exteriora tolerare. Sed memento quia apostolicam sedem regis, & dolorem citius temperas: quoniam omnibus omnia factus es. In libris Regum, sicut perfecta vestra sanctitas nouit, quidam describitur, qui utraque manu pro dextera vtebatur. In qua re ego de dulcissimo atque sanctissimo dudum patrono domino meo Anastasio dubius non sum, quia dum terrena opera ad cælestem utilitatem pertrahit, in usum dextræ vertit sinistram: ut & cælestis intentio opus suum videlicet dextra peragat, & cura temporalium dum ad iustitiae utilitatem ducitur, ad fortitudinem dextra sinistra permutetur. Et quidem hæc esse sine graui labore & tædio nequaquam possunt. Sed recordemur labores præcedentium, & dura non erunt quæ toleramus. Per multas enim tribulationes operari nos introire in regnum Dei. Et supra modum grauati sumus, <sup>1. Cor. 1.</sup> supra virtutem, ita ut nos tæderet viuere. Sed & ipsi in nobis responsum mortis habuimus, ut non simus fidentes in nobis. Et <sup>A. 14.</sup> Rom. 8. tamen non sunt condignæ passiones huius temporis ad superuenientem gloriam, quæ reuelabitur in nobis. Quomodo igitur sine labore transtire possumus æstum huius saeculi, nos infirmæ oves, in quo grauiter fudassem nouimus & arietes? Quantas vero in hac terra tribulationes de Longobardorum gladiis, de iniuriatibus iudicium, de insolentia atque importunitate causarum, de cura subiectorum, de molestia etiam corporis quam patior, explere nec calamo nec lingua sufficio. De quibus & si qua breuiter possum loqui, dubito ne vestræ sanctissimæ caritati, dum de suis tribulationibus affligitur, etiam meas augeam. Sed omnipotens Deus, & suæ largitate pietatis sanctissimæ ve-

Hhh iij

stræ beatitudinis mentem omni consolatione repleat, & indignum me aliquando ab his quæ patior malis quiescere pro vestra intercessione concedat. Amen. Gratia. Quæ videlicet verba de scriptis vestris accepta, idcirco in meis epistolis pono, ut de sancto Ignatio vestra beatitudo cognoscatur, quia non solum vester est, sed etiam noster. Sicut enim magistrum eius apostolorum principem habemus communem, ita quoque eiusdem principis discipulum nullus nostrum habeat priuatum. Benedictionem autem vestram qua debuimus mente suscepimus, bene redolentem, bene sapientem. Et omnipotenti Deo gratias agimus, quia & odora sunt & sapora quæ agitis, quæ dicitis, quæ datis. De vita igitur vestra dicamus pariter, dicamus omnes: *Gloria in excelsis Deo, & in terra pax hominibus bonæ voluntatis.*

Lxx 2.

## EPISTOLA XXXVIII.

## GREGORII PAPÆ I.

AD IOANNEM EPISCOPVM CONSTANTINOPOLITANVM.

De pace sanctæ ecclesiæ ab eo per vniuersalis nomen turbata. De Synodo per Pelagium papam cassata. Exemplum proponit diaboli contra Deum superbientis. Et de superbia eius nimia.

*Gregorius Ioanni episcopo Constantinopolitano.*

Ioan. diac.  
libro 3. cap.  
54.

E o tempore quo fraternitas vestra in sacerdotalem honorem prouecta est, quantam ecclesiarum pacem atque concordiam inuenerit recolit. Sed quo ausu, quo vertumore, nescio nouum sibi conata est nomen arripere, unde omnium fratrum corda potuissent ad scandalum pervenire. Quia in re vehementer admiror, quia ne ad episcopatum venire potuisses, fugisse velle te memini: quem tamen adeptum ita exercere desideras, ac si ad eum ambitioso desiderio cucurrisse. Qui enim indignum te esse fatetbaris, ut episcopus dici debuisses, ad hoc quandoque perductus es, ut despexitis fratribus episcopus appetas solus vocari. Et quidem hac de re sanctæ memorie decessoris mei Pelagii grauia ad sanctitatem vestram scripta transmissa sunt. In quibus Synodi, quæ apud vos de fratribus quondam & consacerdotis nostri Gregorii causa congre-

gata est, propter nefandum elationis vocabulum, acta dis-  
soluit: & archidiaconum, quem iuxta morem ad vesti-  
gia dominorum transmiserat, Missarum vobiscum solen-  
nia celebrare prohibuit. Post eius vero obitum, cum in-  
dignus ego ad ecclesiæ regimen adductus sum, & ante per  
alios responsales meos, & nunc per communem filium  
meum Sabinianum diaconum alloqui fraternitatem ve-  
stram, ut a tali se præsumptione compesceret, non equi-  
dem scripto, sed nudo sermone curau. Et si emendari  
nolle, eum Missarum solennia cum fraternitate vestra  
celebrare prohibui, ut sanctitatem vestram prius sub qua-  
dam verecundiæ reuerentia pulsarem; quatenus si emen-  
dari nefandus ac profanus tumor verecunde non posset,  
tunc ad ea debuisset quæ sunt disticta atque canonica  
perueniri. Et quia resecanda vulnera prius leui manu pal-  
panda sunt; rogo, deprecor, & quanta possum dulcedine  
exposco, ut fraternitas vestra cunctis sibi adulantibus, at-  
que erroris nomen referentibus contradicat, nec stulto  
ac superbo vocabulo appellari consentiat. Vere enim  
flens dico, atque ex intimo viscerum dolore peccatis meis  
deputo, quod ille meus frater nuncusque ad humilitatem  
reduci non valuit, qui ad hoc in episcopatus gradu consti-  
tutus est, ut aliorum animas ad humilitatem reducat:  
quod ille, qui veritatem docet alios, semetipsum docere,  
nec me quoque deprecante consensit. Perpende, rogo,  
quia in hac præsumptione temeraria pax totius turbatur  
ecclesiæ, & gratiæ contradictitur communiter omnibus ef-  
fusæ; in qua nimirum ipse tantum crescere poteris, quan-  
tum penes temetipsum decreueris, tantoque maior effi-  
ceris, quanto te a superbi & stulti vocabuli usurpatione  
restringis, atque instantum proficis, inquantum tibi non  
studueris derogando fratribus arrogare. Humilitatem er-  
go, frater carissime, totis visceribus dilige, per quam cun-  
ctorum fratrum concordia, & sanctæ vniuersalis ecclesiæ  
vnitas valeat custodiri. Certe Paulus apostolus cum audi-  
ret quosdam dicere: *Ego sum Pauli, ego Apollo, ego vero Cephæ,*  
1. Cor. 1.  
hanc dilacerationem corporis dominici, per quam mem-  
bra eius aliis quodammodo se capitibus sociabant, vehe-  
mentissime perhorrescens exclamauit, dicens: *Numquid ibidem.*  
*Paulus pro vobis crucifixus est: aut in nomine Pauli baptizati*

*estis?* Sic ergo ille membra dominici corporis certis extra Christum quasi capitibus, & ipsis quidem apostolis subiici particulariter euitauit: tu quid Christo vniuersalis sanctæ ecclesiæ capiti in extremi iudicii es dicturus examine, qui cuncta eius membra tibimet conaris vniuersalis appellatione supponere? *Quis,* rogo, in hoc tam peruerso vocabulo, nisi ille ad imitandum proponitur, qui despectis angelorum legionibus secum socialiter constitutis, ad culmen conatus est singularitatis erumpere, ut & nulli subesse, & solus omnibus praefesse videretur? *Qui etiam dixit:*

14.

*In cælum confundam: super astra cæli exaltabo solium meum. Sedebo in monte testamenti, in lateribus Aquilonis. Ascendam super altitudinem nubium, similis ero Altissimo.* Quid enim fratres tui omnes vniuersalis ecclesiæ episcopi, nisi astra cæli sunt? *Quorum vita simul & lingua inter peccata erroresque hominum quasi inter noctis tenebras lucent.* *Quibus dum cupis temetipsum vocabulo elationis præponere, eorumque nomen tui comparatione calcare, quid aliud dicis, nisi: In cælum confundam: super astra cæli exaltabo solium meum?* An non vniuersi episcopi nubes sunt, qui & verbis prædicationis pluunt, & bonorum operum luce & miraculis coruscāt? *Quos dum vestra fraternitas despiciens sub se premere conatur, quid aliud dicit, nisi hoc quod ab antiquo hoste dicitur: Ascendam super altitudinem nubium?* Quæ cuncta ego cum flens conspicio, & occulta Dei iudicia pertimesco, augentur lacrymæ, gemitus se in meo corde non capiunt, quod ille vir sanctissimus dominus Ioannes, tantæ abstinentiæ, atque humilitatis, suorum familiarium seductione linguarum ad tantam superbiam erupit, ut in appetitu peruersi nominis illi esse conetur similis, qui dum superbe esse similis Deo voluit, etiam donatae similitudinis gratiam amisit, & ideo veram beatitudinem perdidit, quia falsam gloriam quaesivit. Certe Petrus apostolus primum membrum sanctæ & vniuersalis ecclesiæ est. Paulus, Andreas, Ioannes, quid aliud quam singularium sunt plebium capita? & tamen sub uno capite omnes membra sunt ecclesiæ. Atque, ut cuncta breui cingulo locutionis adstringā, sancti ante legem, sancti sub lege, sancti sub gratia, omnes hi perficientes corpus Domini, in membris sunt ecclesiæ constituti, & nemo se vñquam vniuersalem vocare

care

care voluit. Vestra autem sanctitas agnoscat quantum apud se tumeat, quæ illo nomine vocari appetit, quo vocari nullus præsumpsit, qui veraciter sanctus fuit. Numquid non, sicut vestra fraternitas nouit, per venerandum Calchedonense Concilium huius apostolicæ sedis antistites, cui Deo disponente deseruio, vniuersales oblato honore vocati sunt? Sed tamen nullus vñquam tali vocabulo appellari voluit, nullus sibi hoc temerarium nomen arripuit: ne si sibi in pontificatus gradu gloriæ singularitatis arriperet, hanc omnibus fratribus denegasse videretur. Sed hæc scio, quia vestræ sanctitati ab illis oriuntur, qui vobis deceptiosa familiaritate deseruunt: contra quos peto, ut vestra fraternitas solerter inuigilet, nec se eorum verbis fallendum præbeat. Tanto enim maiores hostes credendi sunt, quanto magis laudibus adulantur. Relinque tales, et si omnino decepturi sunt, saltem terrenorum hominum & non sacerdotum corda decipient. *Sine mortuos sepelire mor- Luc. 9.*  
*tuos suos.* Vos autem cum Propheta dicite: *Auertantur sta- Psal. 69.*  
*tim erubescentes, qui dicunt mihi, euge, euge.* Et rursus: *Oleum au- Psal. 140.*  
*tem peccatoris non impinguet caput meum.* Vnde & bene quidam sapiens admonet: *Multi sint pacifici tui, consiliarius autem Ecclef. 6.*  
*sit unus tibi de mille.* Corrumpt enim bonos mores colloquia mala. *1. Cor. 15.*  
Antiquus enim hostis cum robusti cor irrumpere non valet, subiectas & infirmas personas querit, & quasi contra alta moenia scalis appositis ascendit. Sic Adam per subie- *Gen. 3.*  
*ctam mulierem decepit. Sic beato Job, cum filios occidit,* *Job. 2.*  
*infiriam mulierem reliquit, ut qui eius cor per se minime poterat, saltem si posset per mulieris verba penetraret.* Quicumque ergo iuxta vos infirmi, ac sæculares sunt, in sua semper persuasione atque adulacione frangantur: quia inde æternas Dei inimicitias pariunt, vnde ipsi peruersi amatores videntur. Certe olim clamabatur per apostolum Ioannem: *Filioli, nouissima hora est,* secundum quod Veritas prædixit. Pestilentia & gladius per mundum sævit, gentes insurgunt in gentes, terra concutitur, orbis cum habitatoribus suis terra dehincente sorbetur. Omnia enim quæ prædicta sunt, fiunt. Rex superbiæ prope est, & quod dici nefas est, sacerdotum est preparatus exitus: quia certi militans elationis, qui ad hoc positi fuerant ut ducatum præberent humilitatis. Sed hac in re, etiam si nostra

*Concil. Tom. 13.*

Iii

lingua minime contradicat , illius virtus contra elationem in vltionem erigitur , qui superbiæ vitio per semet ipsum specialiter aduersatur. Hinc enim scriptum est : *Deus superbis ressifit , humiliibus autem dat gratiam.* Hinc rursus dicitur : *Immundus est apud Deum qui exaltat cor.* Hinc contra superbientem hominem scriptum est : *Quid superbis terra , & cinis?* Hinc per semetipsam Veritas dicit : *Omnis qui se exaltat humiliabitur.* Quæ vt nos ad viam vitæ per humilitatem reduceret , in semetipsa dignata est quod nos admonet demonstrare , dicens : *Discite a me quia misericordia sum & humiliis corde.* Ad hoc namque Vnigenitus Dei Filius formam infirmitatis nostræ suscepit : ad hoc inuisibilis , non solum visibilis , sed etiam despectus apparuit : ad hoc contumeliarū ludibria , illusionum probra , passionum tormenta tolerauit , vt superbū non esse hominem doceret humilius Deus. Quanta igitur humilitatis virtus est , propter quam solam veraciter edocendam , is qui sine estimatione magnus est , vsque ad passionem mortis factus est paruuus? *Quia enim originem perditionis nostræ se præbuit superbia diaboli , instrumentum redemptionis nostræ inuenta est humilitas Dei.* Hostis quippe noster inter omnia conditus , videri supra omnia voluit elatus. Redemptor autem noster magnus manens supra omnia , fieri inter omnia dignatus est paruuus. Quid ergo nos episcopi dicimus , qui honoris locum ex Redemptoris nostri humilitate suscepimus , & tamen superbiam hostis ipsius imitamus? Ecce nouimus creatorem nostrum de suæ celitudinis culmine , vt humano generi daret gloriam , descendisse , & nos de infimis creati , de fratum minoratione gloriam quaerimus. Humiliauit se vsque ad nostrum puluerem Deus , & in cælos os suum ponit , & super terram lingua pertransit puluis humanus , & non erubescit : non metuit extolli homo putredo , & filius hominis vermis. Reducamus ad animum , frater carissime , hoc quod per sapientissimum Salomonem dicitur : *Ante tonitruum præbit coruscatio , & ante ruinam exaltabitur cor.* Vbi e diuerso subiungitur : *Ante gloriam humiliabitur.* Humiliemur ergo in mente , si ad solidam conamur venire celitudinem. Nequaquam per elationis fumum oculi cordis obscurentur , qui quanto magis excreuerit , tanto celerius euanscitur. Pensemus quid nos præ-

*Jacob. 4.**Ecclesiastes 10.**Luc. 14.**Matthew. 11.**Tob. 25.**Ez. 32.*

cepta admoneant Redemptoris nostri dicentis: *Beati pauperes spiritu, quoniam ipsorum est regnum cælorum.* Hinc etiam per prophetam dicit: *Super quem requiescat Spiritus meus, nisi super humilem & quietum, & trementem sermones meos?* Certe cum Dominus ad humilitatis viam adhuc infirmantium discipulorum corda reduceret, dixit: *Si quis vult inter vos primus esse, erit omnium minimus.* Quia in re aperte cognoscitur, quoniam ille veraciter sublimis est, qui in suis cogitationibus humiliatur. Formidemus ergo in illorum numerum adscribi, qui *primas in synagogis cathedras querunt, & saltationes in foro, & vocari ab hominibus Rabbi.* Quo contra discipulis Dominus dicit: *Vos autem nolite vocari Rabbi: unus enim magister vester est, vos autem omnes fratres estis.* Et patrem nolite vocare vobis super terram: *vñus est enim Pater vester.* Quid ergo, frater carissime, in illo terribili examine venientis iudicis dicturus es, qui non solum pater, sed etiam generalis pater in mundo vocari appetis? Caeatur ergo malorum praua suggestio, fugiatur omnis instigatio diaboli. Oportet quidem ut veniant scandala: *verum tamen vñus ho- mini illi per quem scandalum venit.* Ecce ex hoc nefando elationis vocabulo ecclesia scinditur: fratum omnium corda ad scandalum prouocantur. Numquidnam mente excidit quod Veritas dicit: *Quis scandalizauerit vñum de pueris ibidem. istis, qui in me credunt, expedit ei ut suspendatur mola asinaria in collo eius, & demergatur in profundum maris?* Scriptum vero est: *Caritas non querit quæ sua sunt.* Ecce vestra fraternitas sibi arrogat etiam aliena. Rursus scriptum est: *Honore inuenientes.* Et tu conaris eum omnibus tollere, quem tibi illicite desideras singulariter usurpare. Vbi est, frater carissime, quod scriptum est: *Pacem habete cum omnibus & sanctimoniam, sine qua nemo videbit Deum?* Vbi est quod scriptum est: *Beati pacifici, quoniam filii Dei vocabuntur?* Considerare vos conuenit, ne qua radix amaritudinis sursum germinans impedit, & per illam coquincentur multi. Quod tamen si considerare negligimus, contra tantæ elationis tumorem iudicia superna vigilabunt. Et nos quidem in quos talis tanta per ausum nefariū culpa committitur, seruamus quod Veritas præcepit, dicens: *Si peccauerit in te frater tuus, vade, & corripe eum inter te & ipsum solum.* Sit audierit, lucratus eris fratrem tuum. Si autem te non audierit,

*Concil. Tom. 13.*

Iii ij

*adhibe tecum adhuc unum vel duos, ut in ore duorum vel trium  
testium stet omne verbum: quod si non audierit eos, dic ecclesia. Si  
autem ecclesiam non audierit, sit tibi sicut ethnicus & publicanus.  
Ego itaque per responsales meos semel & bis verbis humili-  
ibus hoc quod in tota ecclesia peccatur corripere studui:  
nunc per meipsum scribo. Quidquid facere humiliter de-  
bui non omisi. Sed si in mea correptione despicio, restat  
ut ecclesiam debeam adhibere. Hæc itaque dicens, omni-  
potens Deus fraternitati vestræ indicet, quanto circa vos  
amore constringor; quantumque in hac causa non contra  
vos, sed pro vobis lugeo. In qua tamen præceptis euange-  
licis, institutionibus Canonum, utilitatibus fratrum per-  
sonam præponere non possum, nec eius quem multum  
amo. Scripta autem sanctitatis vestræ dulcissima atque  
suauiissima de causa presbyterorum Ioannis & Athanasii  
suscepi, de qua vobis in subsequentibus domino adiuuan-  
te respondebo, quia sub tantis tribulationibus circumfu-  
sus barbarorum gladiis premor, ut non dico multa traœta-  
re, sed mihi respirare vix liceat. Data Kalendis Ianuarii in-  
diætione XIII.*

## EPISTOLA XXXIX.

G R E G O R I I P A P Æ I.

AD SABINIANVM DIACONVM.

De superbia Ioannis episcopi vitanda.

*Gregorius Sabiniano diacono.*

Ioan. diac.  
lib. 3. cap.  
55.

**D**E causa fratris nostri viri reuerendissimi Ioannis epi-  
scopi Constantinopolitani duas epistolas facere no-  
lui. Sed vna breuiter facta est, quæ vtrumque habere vi-  
deretur admixtum, id est, & rectitudinem & blandimen-  
tum. Tu itaque dilectio eam epistolam, quam nunc dire-  
xi, propter voluntatem imperatoris dare studeat. Nam de  
subsequenti talis alia transmittitur, de qua eius superbia  
non lætetur. Ad hoc enim usque peruenit, ut sub occasio-  
ne Ioannis presbyteri gesta huc transmitteret, in quibus  
se pene per omnem versum οἰκουμένην patriarcham nomi-  
naret. Sed spero in omnipotentem Deum, quia hypocri-  
sim illius superna maiestas soluet. Miror autem quomodo  
dilectionem tuam fallere potuit, ut permetteres domno

imperatori persuaderi, quatenus ad me sua scripta de hac causa transmitteret, in quibus admonerer *vt cum eo pacem habere debuisssem*. *Quis si iustitiam tenere vult, illum debuit admonere vt se a superbo vocabulo compesceret*, & protinus inter nos pax fieret. Tamen qua id calliditate a prædicto fratre nostro Ioanne factum sit, minime suspicor pensasti. Idcirco enim hoc ille fecit *vt audiretur dominus imperator*, & ille in sua vanitate confirmatus esse videretur; aut non a me audiretur, & eius animus contra me irritaretur. Sed nos rectā<sup>\* fort. viā</sup> vitam tenemus, nihil in hac causa aliud nisi omnipotentem Dōminum metuentes. Vnde tua dilectio in nullo trepidet. Omnia quae in hoc sæculo videt<sup>\* fort. acta</sup> alta esse contra veritatem, pro veritate despiciat; in omnipotentis Dei gratia atque beati Petri apostoli adiutorio confidat. Vocem Veritatis recolat dicentis: *Maior est qui in cælis est, quam qui in mundo*, & in hac causa quidquid agendum est cum summa auctoritate agat. Postquam enim defendi ab inimicorum gladiis nullo modo possumus, postquam pro vtilitate reipublicæ argentum, aurum, mancipia, vestes perdidimus, nimis ignominiosum est *vt per eos etiam fidem perdamus*. In isto enim scelesto vocabulo consentire, nihil est aliud quam fidem perdere. Vnde sicut tibi iam transactis epistolis scripsi, nunquam cum eo procedere præsumas.

## EPISTOLA XL.

## GREGORII PAPÆ I.

AD THEODORVM MEDICVM.

Gratias refert de pecunia pauperibus transmissa.

*Gregorius Theodoro medico.*

**E**GO omnipotenti Deo gratias ago, quia eorum qui se vicissim veraciter diligunt loca animū non diuidunt. Ecce enim, dulcissime & gloriosissime fili, longe a vobis distamus corpore, & tamen præsentes vobis existimus caritate. Hoc vestra opera, hoc scripta testantur, hoc de præsenti expertus sum, hoc de absenti vestra gloria recognosco. Hoc vos & hominibus amabiles, & omnipotenti Deo dignos in perpetuum faciat. Quia enim virtutum mater est caritas, idcirco bonos operum fructus profertis,

Iii iij

quia ipsam eorumdem fructuum in mente radicem tene-  
tis. Ea autem quæ in redemptionem captiuorum Deo  
vobis inspirante transmisisti, latus, fateor, & tristis acce-  
pi. Latus videlicet vobis, quos de præparanda mansione  
cælestis patriæ cogitare cognoui; tristis vero vehementer  
mihi, qui super curam rerum sancti Petri apostoli, adhuc  
etiam de rebus dulcissimi filii mei domni Theodori ratio-  
nes positurus sum: solicite an negligenter eas expenderim,  
requirendus vado. Omnipotens autem Deus, qui men-  
ti vestræ suæ misericordiæ viscera infudit, qui vobis foli-  
cite cogitare concessit hoc quod de Saluatore nostro per

*2. Cor. 8.**Ecclesi. 29.*

egregium prædicatorem dicitur: *Quia pro nobis egenus factus  
est, cum diues esset, in eiusdem Salvatoris aduentu vos virtu-  
tibus diuites ostendat, ab omni culpa liberos affltere fa-  
ciat, & pro terrenis cælestia, pro transitoriis gaudia vobis  
æterna concedat.* Hoc autem quod pro vobis agi apud sa-  
cratissimum corpus sancti Petri apostoli scribitis, cer-  
tum tenete, quia etsi lingua vestra taceat, fieri caritas ve-  
stra iubet. Sed utinam digni simus, qui pro vobis orare de-  
beamus. *Quia vero dignus ego non sum, non ambigo:*  
sed multi hic digni sunt, qui ex oblatione vestra ab hosti-  
bus redimuntur, & fideliter nostro creatori deseruiunt,

de quibus hoc egitis quod scriptum est: *Absconde elemo-  
synam in sinu pauperis, & hæc pro te exorabit.* Sed quia ille plus  
diligit, qui plus præsumit; erga dulcissimam mentem  
gloriosissimi filii mei domini Theodori habeo aliquam  
querelam; quia donum ingenii, donum rerum, donum  
misericordiæ atque caritatis a sancta trinitate percepit, sed  
tamen sæcularibus indefinenter causis adstringitur, affi-  
duis processionibus occupatur, & quotidie legere negligit  
verba Redemptoris sui. *Quid est autem scriptura sacra, ni-  
si quædam epistola omnipotentis Dei ad creaturam suam?*  
Et certe sicubi esset gloria vestra alibi constituta, & scri-  
pta terreni imperatoris acciperet, non cessaret, non quie-  
siceret, somnum oculis non daret, nisi prius quid sibi im-  
perator terrenus scripsisset agnouisset. Imperator cæli,  
Dominus hominum & angelorum, pro vita tua tibi suas  
epistolas transmisit; & tamen, gloriose fili, easdem epi-  
stolas ardenter legere negligis. Stude ergo, quæso, & quo-  
tidie creatoris tui verba meditare. Disce cor Dei in verbis

EPISTOLARVM LIBER IV. 439

Dei, ut ardentius ad æterna suspires, ut mens vestra ad cælestia maioribus desideriis accendatur. Tanto enim tunc maior ei erit requies, quanto modo ab amore conditoris sui requies nulla fuerit. Sed ad hæc agenda infundat vobis omnipotens Deus consolatorem Spiritum. Ipse mentem vestram sua præsentia impleat, & implendo leuet. De me autem cognoscite, quia multas hic & innumeratas amaritudines patior. Sed ago omnipotenti Deo gratias, quia minus affliger valde, quam mereor. Carissimum autem filium meum susceptum vestrum dominum Narsetem gloriæ vestræ commendabo. Quem quidem scio commendatum in omnibus habetis; sed facere vos rogo quod facitis, ut dum peto quod fieri video, mercedi vestræ me petendo subiungam. Præterea excellentiæ vestræ benedictionem ea qua transmissa est caritate suscepit. Vnam vero anatem cum duobus paruulis Atticis pro vestri amoris gratia transmittere præsumpsi, ut quotiens ad respiciendum eam vester oculus ducitur, memoria etiam mei inter occupationes tumultusque causarum in animum vestrum reuocetur.

EPISTOLA XLI.

GREGORII PAPÆ I.

AD LVMINOSVM ABBATEM,

Scribit omnia grauamina a monasterio illius auferenda.

*Gregorius Luminoso abbati monasterii sancti Thomæ de Arimino.*

PETITIONEM tuam congregationisque tuae libenter suscepimus, secundum statuta patrum iurisque formam tuis precibus accommodantes esse etum. Castorio fratri & coepiscopo nostro nostra præceptione transmissa est epistola, successoribusque eius, & a te monasterioque tuo cunctam læsionis funditus abstulimus potestatem, ut nec ultra in vestro versetur grauamine, nec monasterii res describat, nec publica illic debeat esse processio: illa videlicet ei iurisdictione reliqua, ut in defuncti abbatis locum alium, quem dignum communis consensus congregationis elegerit, debeat ordinare. His autem ita perfectis, in Dei opere estote solliciti, & assidue operam orationi da-

te, ne non videatur magis vobis quæsita mentis in oratione securitas, sed male, quod absit, degentibus episcopalis euitata districtio.

## EPISTOLA XLII.

## GREGORII PAPÆ I.

AD LEONTIVM EPISCOPVM ARIMINENSEM.

De visitatione Ariminensi melius procuranda.

*Gregorius Leontio episcopo visitatori Ariminensis ecclesie.*

Iuo p. 7. c.  
12. & 13.  
Grat. 18. q.  
2. cap. 6.

**C**LERO Ariminensis ecclesiæ, cuius visitator es, con querente, comperimus quod, remotis omnibus clericis, fraternitas tua hominibus suis patrimonii eius gubernationem ceterasque utilitates commiserit peragendas. Quod si ita est, querelam eiusdem cleri ineptam esse non credimus. Ea de re his te hortamur affatibus, ut omnia quæ ad suprascriptā ecclesiam pertinent, per proprios eius homines, quos ipse præuideris, siue per diaconum latorem præsentium gubernari agique disponas, ut nulla eis aduersum te iusta murmurādi relinquatur occasio. Si vero quædam de eis infidelitatis est fortasse suspicio, cum eis quoque homines tuos in actione constitue, ut alterna erga se sollicitudine debeant esse custodes, rationes tibi modis omnibus posituri. Quidquid vero de redditibus ecclesiæ ipsius accesserit, quatuor iuxta consuetudinem oportet fieri portions, vnam scilicet, quæ clero præbenda sit, aliam quæ pauperibus. De reliquis autem duabus partibus tres fieri volumus. Vnam sartis tectis profuturam, aliam pro sustentatione sua Caftorio proprio episcopo dirigendam, reliquam tibimet retinendam. Si quis igitur in suprascriptæ ecclesiæ clero dignus fuerit presbyter, vel diaconus, siue in gradu alio, ordinari, liberam habebis ex nostra auctoritate eum promouendi licentiam. In lucrando ergo animabus inuigila, circa clerirectitudinem esto sollicitus. Utilitates ecclesiæ, cuius visitationem geris, iniuste perire vel deteriorari nulla surreptione permittas; ne, quod absit, & apud Deum perpetui labem periculi, & apud nos reatum culpæ possis incurrire. Comperimus præterea aliiquid te annonæ de publico consequi, & hac ex re verecundia comprimi, atque in causis ecclesiæ, vel defen-

defensione pauperum , vt congruit , non esse efficacem. Propterea abstinentum est ab hoc quod verecundiam in- cutit , & stipendiis , quæ de ecclesia consequeris , debes esse contentus : nam si aliter facere post nostram adhortationem volueris , aliam de te æstimationem habebimus ; quippe qui commissos tibi auaritiae militare doces , quos sufficientibus stipendiis instituis non esse contentos.

EPISTOLA XLIII.

GREGORII PAPÆ I.

AD CASTORIVM EPISCOPVM ARIMINENSEM.

Vt Luminoso abbati eiusque monasterio nullam  
inquietudinem faciat.

*Gregorius Castorio episcopo Ariminensi.*

**L**VMINOSVS abbas monasterii sanctorum Andreæ & Thomæ, in Ariminensi ciuitate constituti, quas nobis lacrymabiliter preces effuderit, inditæ textus petitionis informat. Pro qua re fraternitatem tuam hortamur, vt obeunte abbatे monasterii ipsius, ecclesia tua in describendis prouidendisque acquisitis, acquirendisve eiusdem monasterii rebus, nulla se occasione permisceat. Abbatem vero eidem monasterio non alium, sed quem dignum moribus atque actibus monasticae disciplinae communi consensu congregatio tota poposcerit, te volumus ordinare. Missas autem illic publicas per episcopum fieri omnimodo prohibemus, ne in seruorum Dei secessibus popularibus occasio præbeatur vlla conuentibus, & simpliciores ex hoc animas plerumque, quod absit, in scandalum trahat ; frequentior quoque introitus mulieribus arceatur. Hanc autem scriptorum nostrorum paginam omni in futuro tempore a te, vel post te episcopis ordinandis, firmam statuimus illibatamque seruari, vt & tua ecclesia, iuuante Domino, suo tantummodo sit iure contenta, & monasterium illud nulli ulterius aliqua ratione generali canoniceve iurisdictioni deseruiens, remotis vexationibus accunctis grauaminibus, diuinum opus cum summa animi deuotione perficiat. Mense Iulii, indictione XIII.

*Mense Iulii, indictione tertiadecima.*

EPISTOLA XLIV.

*Gesta Synodi habitæ a beato Gregorio papa tempore Mauricii Augusti in urbe Roma.*

REGNANTE in perpetuum Domino nostro Iesu Christo, temporibus piissimi ac serenissimi dominorum Mauricij, & Tiberij, & Theodosij Augustorum eiusdem domini, imperio Mauricij anno\* tertiodecimo, indictione tertiadecima, quinto die mensis Iulii: Gregorius papa coram sanctissimo beati Petri corpore, cum episcopis omnibus ac Romanæ ecclesiæ presbyteris residens, astantibus diaconibus & cuncto clero, dixit: In sancta Romana ecclesia, cui diuina dispensatio praesesse me voluit, dudum consuetudo est valde reprehensibilis exorta, vt quidam ad sacri altaris ministerium cantores eligantur, & in diaconatus ordine constituti modulationi vocis inseruant, quos ad prædicationis officium eleemosynarumque studium vacare congruebat. Vnde fit plerumque, vt ad sacram ministerium dum blanda vox queritur, queri congrua vita negligatur, & cantor minister Deum moribus stimulet, cum populum vocibus delestat. Quia in re præsenti decreto constituo, vt in hac sede sacri altaris ministri cantare non debeant, solumque euangelicæ lectionis officium inter Missarum solennia exoluant; psalmos vero ac reliquas lectiones censeo per subdiaconos, vel, si necessitas fuerit, per minores ordines exhiberi. Si quis autem contra hoc decretum meum venire tentauerit, anathema sit. Et omnes responderunt: Anathema sit. Verecundum mostroporem indiscretionis inuoluit, vt huius sedis pontificibus ad secreta cubiculi seruitia laici pueri ac sacerulares obsequantur, & cum pastoris vita esse discipulis semper debeat in exemplo, plerumque clerici qualis in secreto sit vita sui pontificis nesciunt, quam tamen, vt dictum est, pueri sciunt sacerulares. De qua re præsenti decreto constituo, vt quidam ex clericis, vel etiam ex monachis electi, ministerio cubiculi pontificalis obsequantur; vt is qui in loco est regiminis, habeat testes tales, qui vitam eius in secreta conuersatione videant, & ex visione sedula exemplum pro-

Iue p. 2. c.  
79. An. lib.  
7. cap. 79.

fectus sumant. Consuetudo noua in ecclesia hac & valde reprehensibilis erupit, ut cum rectores eius patrimonii urbana vel rustica prædia iuri illius competere posse suspicantur, fiscali more titulos imprimant, atque hoc quod competere pauperibus aestimant, non iudicio sed manibus defendant. Et cum per prædicatores suos Veritas dicat: *Nihil per contentionem, etiam ipsum litigiosæ contentio-* Grat. 16. q.  
6. c. 1. Poly.  
lib. 4. tit. 8.  
*nis malum transcendunt, & res quælibet, cum aestimatur ecclesiæ posse competere, per vim tenetur.* Proinde præfenti decreto constituo, ut si quis ecclesiasticorum unquam titulos ponere sive in rustico, sive in urbano prædio sua sponte præsumperit, anathema sit. Et responderunt omnes: Anathema sit. Is autem qui ecclesiæ præest, si hoc vel ipse fieri præceperit, vel sine sua præceptione factum digna punire animaduersione neglexerit, anathema sit. Et responderunt omnes: Anathema sit. Sicut indignos nos pro beati Petri apostoli reuerentia mens fidelium veneratur; ita nostram infirmitatem decet semetipsam semper agnoscere, & impense sibi venerationis onera declinare. Ex amore quippe fidelium huius sedis rectoribus mos ultra meritum erupit, ut cum eorum corpora humanda deferuntur, hæc dalmaticis contegant, easdem dalmaticas pro sanctitatis reuerentia sibimet partiendas populus scindat, & cum adsint multa a sacris corporibus apostolorum martyrumque velamina, a peccatorum corpore sumitur, quod pro magna reuerentia referuatur: de qua re præfenti decreto constituo, ut feretrum quo Romani pontificis corpus ad sepeliendum ducitur, nullo tegmine veletur. Quam decreti mei curam gerere, sedis huius presbyteros ac diaconos censeo. Si quis vero ex eorum ordine hæc curare neglexerit, anathema sit. Et responderunt omnes: Anathema sit. Antiquam patrum regulam sequens, nihil unquam de ordinationibus accipiendum esse constituo, neque ex datione pallii, neque ex traditione chartarum, neque ex ea quam noua per ambitionem similitatio inuenit appellatione pastelli. Quia enim ordinando episcopo pontifex manum imponit, euangelicam vero lectionem minister legit, confirmationis autem eius epistolam notarius scribit, sicut pontificem non decet manum quam imponit vendere, ita minister vel nota-

*Concil. Tom. 13.*

Kkk ij

Idem Greg.  
in Syn. Ro.  
c. 5. Ius 1. 3.  
tit. 2. c. 7.  
& p. 5. cap.  
109. Anfel.  
lib. 6. c. 8. 3.  
Grat. 1. q.  
7. c. 38.

rius non debet in ordinatione eius vocem suam vel calamum venumdare. Pro ordinatione vero, vel pallio, seu cartis atque pastello, eumdem qui ordinandus, vel ordinatus est, omnino aliquid dare prohibeo. Ex quibus prædictis rebus si quis hinc aliquid commodi appellatione exigere vel deferre forte præsumperit, in districto Dei omnipotentis examine reatu subiacebit. Is autem qui ordinatus fuerit, si non ex placito, neque exactus, neque petitus post acceptas cartas & pallium aliquid cuilibet ex clero gratia tantummodo causa dare voluerit, hoc accipi nullo modo prohibemus; quia eius oblatio nullam culpæ maculam ingerit, quæ ex accipientis ambitu non processit. Multos de ecclesiastica, seu sæculari familia, nouimus ad omnipotentis Dei seruitium festinare, ut ab humana seruitute liberi in diuino seruitio valeant familiarius in monasteriis conuersari: quos si passim dimittimus, omnibus fugiendi ecclesiastici iuris dominium occasionem præbemus: si vero festinantes ab omnipotentis Dei seruitio incaute retinemus, illi inuenimur negare quædam qui dedit omnia. Vnde necesse est, ut quisquis ex iuris ecclesiastici vel sæcularis militia seruitute ad Dei seruitium conuerti desiderat, probetur prius in laico habitu constitutus: & si mores eius atque conuersatio bono desiderio eius testimonium ferunt, absque retractatione seruire in monasterio omnipotenti Domino permittatur, ut ab humano seruitio liber recedat, qui in diuino obsequio distri&tiorem appetit seruitutem.

## SUBSCRIPTIONES EPISCOPORVM.

Gregorius Dei gratia episcopus his decretis subscripsit.

Marinianus episcopus ciuitatis Rauennæ subscripsit.

Paulus episcopus ciuitatis Nepesinensis.

Ioannes episcopus ciuitatis Surrentinæ.

Gratianus ciuitatis Numentanæ.

Ioannes episcopus ciuitatis Falerinæ.

Agnellus episcopus ciuitatis Tarracinensis.

Romanus episcopus ciuitatis \*Bleettanæ.

Dominicus episcopus ciuitatis Centumcellensis.

Pelagius episcopus ciuitatis Anagninæ.

Felix episcopus ciuitatis Portuensis.

Ioannes episcopus ciuitatis Veliternæ.

Candidus episcopus ciuitatis Fulginensis.

Dist. 96. c. 1.

\* fort. Bla  
TANKE.

Luminosus episcopus ciuitatis Ferentinæ.  
 Baldinius episcopus ciuitatis Rosellanae.  
 Secundinus episcopus ciuitatis Tauromeniae.  
 Martianus episcopus ciuitatis Ferensis.  
 Homobonus episcopus ciuitatis Albanensis.  
 Dominicus episcopus ciuitatis Vtriculanæ.  
 Constantius episcopus ciuitatis Narnienfis.  
 Fortunatus episcopus ciuitatis Neapolitanæ.  
 Anastasius episcopus ciuitatis Tiburtinæ.  
 Proculus episcopus ciuitatis Prænestinæ.

## SVBSCRIPTIONES PRESBYTERORVM.

Laurentius presbyter tituli sancti Siluestri subscriptus.  
 Ioannes presbyter sancti Vitalis.  
 Speciosus presbyter sancti Clementis.  
 Deusdedit presbyter sancti Ioannis & Pauli.  
 Andromachus presbyter tituli Apostolorum.  
 Cræsus presbyter sancti Laurentii.  
 Rusticus presbyter sanctæ Susannæ.  
 Vibulus presbyter sancti Marcelli.  
 Petrus presbyter sancti Iulii & Callisti.  
 Spectatus presbyter sancti Vitalis.  
 Stephanus presbyter sancti Marcii.  
 Felix presbyter sancti Sixti.  
 Petrus presbyter sanctæ Balbinæ.  
 Iustus presbyter sanctorum Nerei & Achillæ.  
 Speciosus presbyter sancti Damasi.  
 Maurus presbyter sanctæ Priscæ.  
 Placitus presbyter sanctæ Balbinæ.  
 Victor sanctæ Cæciliae.  
 Ioannes sancti Chrysogoni.  
 Auentius sanctæ Praxedis.  
 Andreas sancti Marcii.  
 Ioannes sanctorum Ioannis & Pauli.  
 Agapitus Apostolorum.  
 Felix sanctæ Sabinæ.  
 Bonus sancti Eusebii.  
 Bassus sancti Prudentis.  
 Ioannes sancti Siluestri.  
 Albinus sanctorum Marcellini & Petri.  
 Antonius sanctæ Balbinæ.  
 Candidus sancti Clementis.  
 Romanus sancti Marcelli.  
 Leo sancti Damasi.  
 Auentius sancti Quiriaci.  
 Fortunatus sanctorum quatuor coronatorum.

## EPISTOLA XLV.

GREGORII PAPÆ I.

AD ANDREAM SCHOLASTICVM.

De ordinatione Mariniani presbyteri ad episcopatum,  
quem suscepit inuitus.*Gregorius Andreæ scholastico.*

**E**XCELLENTISSIMI viri domni Patricii voluntatem in persona Donati archidiaconi implere voluimus: sed quia valde periculorum est animæ temere cuiquam manum imponere, curæ nobis fuit vitam aëtusque eius subtili inuestigatione discutere. Et quoniam multa inuenta sunt, sicut eidem domno Patricio scripsimus, quæ eum proculpa ab episcopatu remouent, Dei iudicium metuentes, in ordinando eo non præsumpsimus consentire. Sed nec Ioannem presbyterum psalmorum nescium præsumpsimus ordinare, quia hæc eum res minus sui profecto habere studium demonstrabat. His igitur remotis, cum ad eligendum de suis a nobis partibus vrgerentur, & nullum se habere ad hoc officium faterentur idoneum, majorque nos vna cum eis teneret afflictio, tandem venerabilem vi-  
rum fratrem presbyterumque Marinianum, quem diu mecum didicere in monasterio conuersatum, communis concordantique voce atque consensu saepius petierunt. Cuique refugienti, diuersis modis vix aliquando potuit suaderi, ut eorum præberet petitioni consensum. Et quia bene nobis eius vita est cognita, atque in lucrantis animabus illum nouimus sollicitum, nullam in ordinatione ipsius moram attulimus. Gloria itaque vestra eum, sicut decet, suscipiat, nouitatique eius consolationis auxilium porrigat: nam omnibus, sicut nostis, cuiuslibet officii valde onerosa est nouitas. Ego autem magnam confidentiam habeo, quia omnipotens Deus, qui eum dignatus est suo gregi præponere, & ad interiora illum curanda exacuet, & ad exteriora gerenda gratiæ suæ pietate confortabit. Sed quia post longa quietis otia, eius, ut prædictimus, nouitas procul dubio perturbatur, peto, ut cum venerit tempestatum sæcularium procellas fugiens, semper apud vestram mentem portum quietis inueniat, & de vestræ bono cari-

EPISTOLARVM LIBER IV. 447

tatis hilarescat. Quantum vero vobis cum illo conuenire valeat, citius cognoscetis, quia ad episcopatum venit inuitus.

EPISTOLA XLVI.

GREGORII PAPÆ I.

AD LEANDRVM EPISCOPVM HISPALENSEM.

Libros in expositionem beati Job, & librum regulæ pastoralis transmittit.

*Gregorius Leandro episcopo Hispalensi.*

**Q**VANTO ardore videre te sitiam, quia valde me diligis, in tui tabulis cordis legis. Sed quia longo terrarum spacio disiunctum te videre nequeo, vnum, quod mihi de te dictauit caritas, feci, ut librum regulæ pastoralis, quem in episcopatus mei exordio scripsi, & libros quos in expositionem beati Job iamdudum me fecisse cognouisti, sanctitati tuæ cum communi filio Probino presbytero veniente transmittenrem. Et tuæ quidem caritati in eo opere tertiaræ & quartær partis codices non transmisi, quia eos solummodo inuenio, quos ex eiusdem partibus codicis, quos iam monasteriis dedi, excerpti. Hos itaque sanctitas tua studiose percurrat, & peccata mea studiosius defeat, ne mihi culpæ grauioris sit, quod quasi scire videor quod agere prætermitto. In hac vero ecclesia quantis causarum tumultibus premor, ipsa caritati tuæ epistolæ meæ breuitas innotescit, quando ei parum loquor, quem magis omnibus diligo.

EPISTOLA XLVII.

GREGORII PAPÆ I.

AD NOBILES SYRACVSANOS.

De episcopo eis eligendo, qui antecessoris probitatem imitari possit.

*Gregorius nobilibus Syracusanis.*

**L**AUDIS vestræ testimonium, quam direxistis epistola, electionis vos onera sapienter declinasse significat. Et quoniam nostro hoc arbitrio commisisti, ac multa bona

de venerandæ memoriaræ quondam Maximiano episcopo referentes talem vobis ordinari depositis, vos quidem sicut decet fideles filios facitis, quia hæc de digno solicito que patre testamini, & obterrantibus aliis bona ipsius etiam post obitum non tacetis. Vnde oramus omnipotentem Dominum, ut & vobis pro sinceritatis vestra voluntate retribuat, & obloquentibus clementer ignoscat. Hoc tamen sciat magnitudo vestra, quia ciuitati illi quem dare possimus, Maximiano reuerendissimo similem non habemus. Sed quia a clero & plebe ecclesiæ Syracusanæ Agatho, ab aliquibus autem alter eligitur; hunc qui a clero & plebe electus est ad nos interim venire necesse est, ut vtrisque cominus constitutis, ille qui Deo placuerit, & utilior visus fuerit, ordinetur. Nam desiderii nostri est, talem illic cum Christi gratia ordinare pontificem, qui bonorum supradicti episcopi, cuius vos actionibus testimoniū perhibetis, in omnibus debeat Deo adiutore imitator existere.

## EPISTOLA XLVIII.

## GREGORII PAPÆ I.

AD IOANNEM ABBATEM DE REGIO.

Decrectione monasterii sancti Andreæ.

*Gregorius Ioanni abbati de Regio.*

**E**A quæ ad correptionem religiosarum pertinent personarum nos præterire nec decet nec conuenit. Peruenit itaque ad nos in monasterio sancti Andreæ, quod iuxta Vulcanum est positum, multa perpetrari facinora. Atque ideo auctoritatis nostræ præceptione suffultum, ad id te monasterium profici sci necesse est, & omnia quæ dicuntur subtili inuestigatione discutere. Et si ita, quod absit, inuenieris, sic in illos regulariter vindicabis, ut digna eos coercito a prauis & illicitis de cetero doceat auctibus abstinere.

EPI-

## EPISTOLA XLIX.

## GREGORII PAPÆ I.

AD PETRVM ET PRVDENTIVM ISTRIÆ EPISCOPOS.

Scribit de fide eis satisfacturum se, promittitque Romam  
venientibus nullam molestiam illaturum.

*Gregorius Petro & Prudentio episcopis de Istria.*

**D**eus qui latatur in unitate fidelium, & reuelat quæren-  
tibus veritatem, cordibus vestris, dilectissimi fratres,<sup>Ioan. diac.  
lib. 4. cap. 27.</sup>  
aperiat, quanto vos desiderio in gremio cupiam sanctæ uniuersalis ecclesiæ contineri, & in eius manere unitate concordes. Quod fore non dubito, si abiecto contentionis stimulo, satisfieri vobis veraciter de his de quibus est dubietas intendatis. Remeantis autem Castorii notarii mei relatione edocitus sum, fraternitatē vestram ad me habere desiderium veniendi, si promissum fuerit quia nullam molestiam sustinebit. Hoc egocognoscens & opto, & succensus ardore caritatis inuito, ut ad me veniendi debeatis laborem assumere, quatenus pariter conferentes, quæ vera, & Redemptori nostro sunt placita, & cōmuniter loquamur, & modis omnibus teneamus. Ego vero diuinæ protectionis gratia suffragante, satisfacere vobis de quibus dubitatis pāratus sum, & confido de omnipotentis Dei misericordia, quod ita vobis satisfactio mea interius inhārebit, ut nihil caritati vestræ de cetero possit ambiguum remanere. Nam illa quæ sanctissimæ quatuor Synodi sapuerūt atque definierunt, sicuti prædecessor noster sanctissimus Leo papa, ita ea & nos sapimus, sequimur, ac tenemus, nec ab earum fide aliquo modo dissentimus. Sed quia plus persona præsens quam epistola satisfacit, hortor, dilectissimi fratres, ut ad me venire, sicut præfatus sum, debeatis, dummodo ratione percepta a concordia sanctæ uniuersalis ecclesiæ dissensio vos nulla dissipiet. Hoc tamen certa sit vestra caritas, quia vos & cum affectu quo decet suscipiam, & cum gratia relaxabo. Nec aliquam vos, vel quoscumque alios qui pro hac ad me causa venire voluerint, afflictionem vel molestiam sustinere promitto. Sed seu ad consentiendum mihi cor vestrum misericordia diuina compunixerit, siue, quod absit, in ea vos durare dissensione contigerit, ad propria vos remeare quando volueritis, iuxta promissionem

*Concil. Tom. 13.*

L11

meam sine lœsione vel molestia relaxare curabimus.

*Mense Augusto, indictione decimatercia.*

## EPISTOLA L.

## GREGORII PAPÆ I.

AD VIRGILIVM EPISCOPVM ARELATENSEM.

Vices illi suas in regno Childeberti concedit. Monet ut simoniacam labem prohibeat, & ne ex laicis repente fiant episcopi. De pallii vsu, & quatenus vices apostolicas obire debeat.

*Gregorius Virgilio episcopo Arelatenſi.*

**O**QVAM bona est caritas, quæ absentia per imaginem præsentia sibi metipſis exhibet per amorem, diuīſa vnit, confusa ordinat, in æqualia sociat, imperfæta consummat. Quam recte prædicator egregius vinculū perfectionis vocat: quia virtutes quidem ceteræ perfectionem generat, sed tamen eas caritas etiam ligat, ut ab amantis mente dissoluiam nequeant. Hac itaque virtute, frater carissime, plenum te esse reperio, sicut mihi de te, & hi qui ex Gallicanis partibus veniunt, & epistolæ tuæ ad me directæ verba testantur. Quod vero in eis, iuxta antiquum morem, vſum pallii ac vices sedis apostolicæ postulaſti, abſit ne aut transitoriae potestatis culmen, aut exterioris cultus ornamentum, in vicibus nostris ac pallio quæſiſſe te ſuspiſcer. Sed quia cunctis liquet, vnde in Galliarum regionibus fides sancta prodierit, cum priscam conſuetudinem ſedis apostolicæ fraternalitas vſtra repetit, quid aliud quam bona ſoboles ad ſinum matris ecclesiæ recurrit? Libent ergo animo postulata concedimus, ne aut vobis quidquam de debito honore ſubtrahere, aut præcellentissimi filii nostri Childeberti regis petitionem contempſiſſe videamur. Sed iam nunc ſtudio maiori res indiget, ut cum honor crescit, etiam ſollicitudo proficiat, & erga ceterorum custodiam vigilantia exrefcat, vitæ quoque merita ſubiectis in exemplum veniant, & nunquam ſua per ſucepti honoris gratiam, ſed lucra cæleſtis patriæ vſtra fraternalitas exquirat. Nostis enim quid beatus Apostolus gentes dicat: *Omnes enim quæ ſua ſunt querunt, non quæ ſunt Christi Iefu.* Quibusdam namque narrantibus agnoui,

*Philip. 2.  
Grat. 1. q.  
1. c. Qui-  
busdam.*

quod in Galliarum vel Germaniæ partibus nullus ad fa-

crum ordinem sine commodi datione perueniat. Quod si ita est, flens dico, gemens denuntio, quia cum sacerdotalis ordo intus cecidit, foris quoque diu stare non poterit: scimus quippe ex euangelio quid Redemptor noster per se-  
Matt. 21.  
 met ipsum fecerit, quia ingressus templum cathedras vendentium columbas euerit. Columbas enim vendere, est de Spiritu sancto, quem Deus omnipotens consubstantiam sibi per impositionem manuum hominibus tribuit, commodum temporale percipere. Ex quo, ut prædixi, malo iam innuitur quid sequatur; quia qui in templo Dei columbas vendere præsumperunt, eorum Deo iudice cathedrae ceciderunt. Qui videlicet error in subditis cum augmento propagatur. Nam ipse quoque qui precio ad sacrum ordinem perducitur, iam in ipsa prouectus sui radice vitiatus, paratior est aliis venum dare quod emit. Et ubi est, quod scriptum est: *Gratis accepisti, gratis date?* Et  
Matt. 10.  
 cum prima simoniaca hæresis sit contra ecclesiam exorta, cur non perpenditur, cur non videtur, quia eum, quem quis precio ordinat, prouehendo agit ut hæreticus fiat? Alia quoque nobis res est valde detestabilis nūtiata, quod quidam ex laico habitu, per appetitum gloriae temporalis, defunctis episcopis tonsurantur, & sunt subito sacerdotes. Qua in re iam notum est qualis ad sacerdotium venit, qui repente de laico habitu ad sacrum transit ducatum, & qui miles nunquam extitit, dux religiosorum fieri non pertimescit. Quam iste prædicationem habiturus est, qui fortasse nunquam audiuist alienam? aut quando aliena mala corrigat, qui necdum sua fleuit? Et cum ad sacros ordines Paulus apostolus neophytum venire prohibeat, sciendum nobis est, quia sicut neophytus tunc vocabatur, qui adhuc nouiter erat eruditione plantatus in fide; ita nunc inter neophytes deputamus, qui adhuc nouus est in sancta conuersatione. Scimus autem, quod ædificati parientes non prius tignorum pondus accipiunt, nisi nouitatis suæ humore siccentur; ne si ante pondera quam solidantur accipient, cunctam simul fabricam ad terram depellant. Et cum ad ædificium arbusta succidimus, ut prius viriditatis humor exsiccati debeat exspectamus; ne si eis adhuc recentibus fabricæ pondus imponitur, ex ipsa nouitate curuentur, & confracta citius corruat, quæ immature

*Concil. Tom. 13.*

LII ij

1. Tim. 3.  
Grat. dist.  
48. cap.  
sicut. Iuo  
part. 5. cap.  
131. & 113.

in altum leuata videbantur. Cur ergo hoc non subtiliter in hominibus custoditur, quod in lignis quoque ac lapidibus tanta consideratione perpenditur? Quia de re necesse est, ut vestra fraternitas præcellentissimum filium nostrum Childebertum regem admonere studeat, ut huius peccati maculam a regno suo funditus repellat, quatenus omnipotens Deus tanto illi apud se maiora retribuat, quanto eum conspicit, & amare quod ipse diligit, & vitare quod odit.

Grat. dist.  
100. cap. 6.  
Anselm. lib.  
6. cap. 98. Itaque fraternitati vestræ vices nostras in ecclesiis quæ sub regno sunt præcellentissimi filii nostri Childeberti, iuxta antiquum morem, Deo auctore committimus: singulis siquidem metropolitis, secundum priscam consuetudinem, proprio honore seruato, pallium quoque transmisimus, quo fraternitas tua intra ecclesiam ad sola Missarum solennia vtatur. Sicubi autem longius episcoporum quisquam pergere forte voluerit, sine tuæ sanctitatis auctoritate ei ad loca alia transire non liceat. Si qua vero inquisitio de fide, vel fortasse aliarum rerum inter episcopos causa emerserit, quæ discerni difficilis possit, collectis duodecim episcopis ventiletur, atque decidatur. Si autem decidi nequiverit, discussa veritate ad nostrum iudicium referatur. Omnipotens autem Deus sua vos protectione custodiatur, honoremque perceptum vos in moribus seruare concedat. Data die vi. Junii, indictione XIII.

NOTA IACOBI SIRMONDI  
SOCIETATIS IESV.

<sup>1</sup> Virgilio episcopo Arelatensi.] Hanc epistolam, & quinquagesimam secundam sequentem, paucis demptis usurpauit Ioannes VIII. cum suas item in Gallia vices Rostagno episcopo Arelatensi committeret, ut infra ad annum Christi 876. videre est.

EPISTOLA LI.  
GREGORII PAPÆ I.  
AD IOANNEM EPISCOPVM CORINTHIORVM.  
De Anastasio episcopo deposito, & diacono eius,  
& de aliis plurimis.  
*Gregorius Joanni episcopo Corinthiorum.*  
ÆQUITATEM atque solicitudinem Secundini fratris &  
Æcoepiscopi nostri, quæ olim bene nobis est cognita,

etiam series indicata scriptorum vestrorum monstrauit. In qua re valde placuit, l<sup>a</sup>tosque nos reddidit, quia in causa Anastasi quondam episcopi, quam ei examinandam iunximus, vigilantiam suam & diligenter exercuit, & cognita crima, vt iustitia poscebat, & oportuit, vindicauit. Sed in his omnibus gratias omnipotenti Deo referimus, qui desistentibus quibusd<sup>a</sup> accusatoribus, cognitioni eius veritatem, ne tantorum causa facinorum latere potuisset, ostendit. Quoniam vero in eadem sententia, in qua superscriptum Anastasium iuste damnatum constat atque depositum, sic quasdam superscriptus frater & coepiscopus noster vltus personas est, vt nostro arbitrio reseruaret; idcirco quid de eis tenendum seruandumque sit præsenti epistola signare perspeximus. Paulum itaque diaconum latorem præsentium, quamuis culpa sua vehementer confundat atque redarguat, quod deceptus promissione ab accusatione nuper depositi quondam episcopi sui destiterit, & cupiditatis studio filere contra animam suam potius quam prodere vera consenserit; tamen quia plus esse conuenit nos misericordes quam districtos, hanc ei culpam ignoscimus, atque eum in ordine locoque suo recipiendum esse censemus. Nam ei a tempore prolatæ sententiæ afflictionem, quam pertulit, credimus ad vindictam huius posse culpæ sufficere. Euphemium vero atque Thomam, qui pro deserenda accusatione episcopi sui sacros ordines acceperunt, eisdem sacris priuatos ordinibus esse censemus, atque ita sicuti sunt depositi volumus permanere, nec vnquam eos sub qualibet excusationis specie sacros in ordines reuocari decernimus. Nam nimis indignum, & contra ecclesiasticæ regulam disciplinæ est, vt honore, quem non ex meritis sed pro sceleris præmio percepérunt, fungantur. Quia tamen plus misericordia quam districtæ nos conuenit operam dare iustitiæ, eosdem Euphemium atque Thomam in ordine locoque tantummodo, vnde ad ordines sacros promoti fuerant, volumus reuocari, & cunctis diebus vitæ suæ eorumdem locorum continentiam, sicut confueuerant, ante percipient. Clematium vero lectorum similiter benignitatis intuitu in ordinem locumque suum reuocandum esse constituo. Quibus etiam omnibus, id est, Paulo diacono, Euphemio,

Thomæ, atque Clematio commoda sua secundum locum & ordinem, in quo quisque eorum est, sicut solitus erat accipere, a præsenti tertiadecima indictione vestra fraternitas sine aliqua studeat imminutione præbere. Quia igitur suprascriptus Paulus diaconus multa se pro vtilitate ecclesiæ vestræ memorat expendisse, & vt ea possit recipere, fraternitatis vestræ solatio desiderat adiuuari; hortamur, vt si ita est, omni ei possibilitate ad recipienda quæ dedit debeat concurrere, atque vestris eum auxiliis adiuuare; quia nulla ratio patitur vt in his quæ pro vtilitate generalitatis impendit aliquod sustineat iniuste dispendium. Præterea tres libras auri, quas imminente suprascripto fratre & coepiscopo nostro Secundino eumdem Paulum diaconum pro vtilitate vestræ dedisse constat ecclesiæ, fraternitas vestra eas cessante dilatione restituat; ne, quod absit, non rationabiliter, sed sola eum grauare voluntate tantummodo videatur.

## EPISTOLA LII.

## G R E G O R I I P A P Æ I.

AD EPISCOPOS GALLIARVM.

Vt Virgilio Arelatenſi, cui vices suas commisit, obedient, ab eo que vocati ad Synodus veniant, nec ad longinqua loca sine illius auctoritate  
pergant.

*Gregorius vniuersis episcopis Galliarum qui sub regno  
Childeberti sunt.*

**A**D hoc dispensationis diuinæ prouisio gradus diuersos, & ordines constituit esse distinctos, vt dum reuerentiam minores potioribus exhiberent, & potiores minoribus dilectionem impenderent, \* vera concordia fieret ex diuersitate contextio, & recte officiorum gereretur administratio singulorum. Neque enim vniuersitas alia poterat ratione subsistere, nisi huiusmodi magnus eam differentiæ ordo seruaret. Quia vero quæque creatura in una eademque qualitate gubernari vel viuere non potest, cœlestium militiarum exemplar nos instruit; quia dum sunt angelii, & sunt archangeli, liquet quod non sunt æquales, sed in potestate & ordine, sicut nostis, differt alter ab altero. Si

ergo inter hos qui sine peccato sunt ista constat esse distin-  
 ctio; quis hominum abnuat huic se libenter dispositioni  
 submittere, cui nouit etiam angelos obedire? Hinc eter-  
 nimpax & caritas mutua se vice complectuntur, & manet  
 firma concordiae in alterna & Deo placita dilectione sin-  
 ceritas. Quia igitur vnumquodque tunc salubriter com-  
 pletur officium, cum fuerit unus ad quem possit recurri  
 praepositus; idcirco opportunum esse perspeximus, in ec-  
 clesiis quae sub regno præcellentissimi filii nostri Childe-  
 berti regis sunt, secundum antiquam consuetudinem, fra-  
 tri nostro Virgilio Arelatensis ciuitatis episcopo vices no-  
 stras attribuere; quatenus & catholicæ fidei integritas, id  
 est, sanctorum quatuor Synodorum Deo protegente soli-  
 ta deuotione seruetur, & si inter fratres confacerdotesque  
 nostros aliqua euenerit forte contentio, auctoritatis suæ  
 vigore, vicibus nempe sedis apostolicæ functus, discreta  
 moderatione compescat. Cui etiam iniunximus, vt si qua-  
 rumdam causarum tale fuerit certamen exortum, in quo  
 aliorum præsentia opus sit, congregatis sibi in numero  
 competenti fratribus & coepiscopis nostris, salubriter  
 hoc seruata æquitate discutiat, & canonica integritate  
 definiat. Si quam vero contentionem, quod longe faciat  
 diuina potentia, de fidei causa euenire contigerit, aut  
 negotium emerserit, cuius vehemens sit fortasse dubietas,  
 & pro sui magnitudine iudicio sedis apostolicæ indigeat,  
 examinata diligentius veritate, relatione sua ad nostram  
 studeat perducere notionem; quatenus a nobis valeat  
 congrua sine dubio sententia terminari. Et quoniam ne-  
 cessè est vt ad eum, cui nostras vices iniunximus, quo-  
 ties oportere perspexerit, pro facienda collatione aptis  
 debeant episcopi temporibus conuenire; hortamur vt  
 nullus mandatis eius inobediens esse præsumat, nec com-  
 muni congregationi interesse postponat, nisi aut corporis  
 infirmitas quempiam fortasse vetuerit, aut cuiusdam eum  
 causæ iusta excusatio minime venire permiserit. Hi ta-  
 men, qui prohibente aliqua necessitate nequeunt in Sy-  
 nodum conuenire, loco suo presbyterum aut diaconum  
 dirigant; quatenus quæ a nostro vicario, Deo auxiliante,  
 fuerint definita, ad eum qui absens est, per ipsum quem  
 miserit fida relatione perueniant, vt inconcussa firmitate

seruentur, & nullius ea quæ constituerit audeat occasionis excusatio violare. Hoc etiam vos pariter præuidimus admonendos, vt nullus vestrum ad longinquiora loca sine præfati fratris & coepiscopi nostri Virgilii auctoritate tentet aliquo modo proficisci; scientes quia & prædecessorum nostrorum, qui vices suas eius prædecessoribus commiserunt, sic procul dubio mandata definiunt. Hortamur præterea, vt de officio suo sit quisque vestrum solicitus, vt qui promissam cupit mercedem paſtionis accipere, commissum sibi gregem sollicitudine & oratione custodiat; ne lupus infidians oues creditas inuadendo dilaniat, & sit in retributione poena pro munere. Optamus igitur, fratres carissimi, & totis omnipotentem Dominum precibus exoramus, vt dilectionem vestram in amoris sui constantia faciat magis magisque feruescere, atque in pace ecclesiæ manere, & in vna vos concedat magnopere retineri concordia. Nuntiatum vero nobis est, quod per simoniacam hæresim ad facros quidam ordines adducantur, & hoc su praescripto fratri & coepiscopo nostro Virgilio per omnia prohibendum mandauimus. Quod vt vestra fraternitas recognoscat, & studiose custodiat, & ipsa coram vobis est epistola relegenda. Data die xi. mensis Auguſti, indictione XIII.

## EPISTOLA LIII.

## GREGORII PAPÆ I.

AD CHILDEBERTVM REGEM FRANCORVM.

Virgilio se vices suas, & pallium regis petitu concessisse:  
hortatur vicissim vt illi faueat in prohibenda  
simonia, & ne ex laicis repente  
fiant episcopi.

*Gregorius Childeberto regi Francorum.*

**L**ÆTOS nos excellentiæ vestræ vehementer fecit epistola, quæ pia vos affectione de honore & reuerentia sacerdotali testatur esse sollicitos. Hinc etenim cunctis ostenditis fideles Dei vos esse cultores, dum sacerdotes ipsius grata ac debita veneratione diligitis, & Christiana deuotione quidquid ad eorum augmentum pertinet agere festinatis. Vnde & gratanter ea quæ scripſtis accepimus,

pimus, & quæ voluistis animo libenti concessimus. Atque ideo fratri nostro Virgilio Arelatensis ciuitatis episcopovices nostras iuxta antiquum morem & excellentiæ vestræ desiderium, Deo fauente, commisimus: cui etiam & pallii vsum, sicut prisca habuit consuetudo, concessimus. Sed quia aliqua ad nos perlata sunt quæ & omnipotentem Deum nimis offendunt, & quamplurimum sacerdotii honorem reuerentiamque confundunt, quæsumus vt potestatis vestræ admittente censura modis omnibus emendentur; ne dum laudandæ deuotioni vestræ res temerariæ ac peruersæ repugnant, aliorum, quod absit, culpa aut regnum vestrum grauetur, aut anima. Peruenit autem ad nos obeuntibus episcopis quosdam ex laicis tonsurari, atque ad episcopatum præcipiti saltu concendere, & qui discipulus non fuit inconsiderata ambitione magister efficitur; & quoniam quod possit docere non didicit, sacerdotium tantummodo gerit in nomine, nam laicus in sermone pristino perseverat & opere. Quomodo ergo pro aliorum peccatis intercessurus est qui sua primitus non defleuit? Talis enim pastor non munit gregem, sed decipit; quia dum contradicente verecundia non potest aliis quod ipse non facit suadere, quid est aliud nisi vt plebs dominica prædonibus populanda remaneat, & inde sumat interitum, vnde salutiferæ protectionis magnum debuit habere subsidium? Quod quam prauum sit quamve peruersum, ex sua quoque ordinatione excellentiæ vestræ celsitudo perpendat. Certum namque est non vos ante exercitu ducem præponere, nisi vobis labor eius fidesque probata constiterit, nisi eum antea&tæ virtæ virtus & solicitude aptum esse monstrauerit. Si vero non aliis nisi huiusmodi viris committitur gubernandus exercitus, qualis dux esse debeat animarum, ex istius rei consideratione, seu comparatione bene colligitur. Sed verecundum nobis est, & dicere pudet, quia ducatum sibi sacerdotes arripiunt, qui exordium religiosæ militiae non viderunt. Simul autem & illud valde execrandū nobis est nuntiatum, quod sacri ordines per simoniacam hæresim, id est, accepto præmio conferuntur. Et quia pestiferum nimis est, & sanctæ ecclesiæ vniuersali contrarium, in sacrum quempiā ordinem non meritis, sed precio collocari, hortamur, vt

*Concil. Tom. 13.*

M mm

tam detestabile facinus de regno suo excellentia vestra prohiberi præcipiat. Nam ipse se ad hoc officium ostendit prorsus indignum, qui donum Dei pecunia mercari non metuit, & commodis præsumit appetere, quod habere per gratiam non meretur. Hæc igitur, præcellentissime fili, idcirco admoneo, quia animam vestram saluari desidero. Quæ etiam dudum scribere volui, si voluntatem meam innumeræ occupationes minime præpedissent. At postquam se congruum rescribendi tempus ingessit, quod facere me oportuit non omisi. Salutantes itaque excellentiam vestram paternæ caritatis affectu, petimus ut cuncta quæ suprascripto fratri & coepiscopo nostro fieri seruari que mandauimus, fauoris vestri præsidio compleantur, ne cuiusquam ea aliquo modo elatione aut superbia conuelli permittatis, sed sicut per prædecessores eius singulos sub glorioſi patris vestri regno seruata sunt, ita quoque auxilio vestro solicita omnino deuotione seruentur. Oportet ergo, ut hoc nobis vicarie rependatur, & sicut nos vestram implere non distulimus voluntatem, ita & vos propter Deum, & beatum Petrum apostolorum principem, nostra faciatis in omnibus seruari statuta; quatenus excellentiæ vestræ laudabilis & Deo placita se circumquaque tendat opinio. Data die XII. mensis Augusṭi, indictione XIII.

## EPISTOLA LIV.

## GREGORII PAPÆ I.

AD MARINIANVM EPISCOPVM RAVENNÆ.

De vſū pallii ei concessō,

*Gregorius Mariniano episcopo Rauennæ.*Ioan. diac.  
lib. 4. c. 5.

**A**POSTOLICÆ sedis benevolentia, & antiquæ consuetudinibus ordine prouocati, fraternitati tuæ, quam in Rauennati ecclesia gubernationis suscepisse constat officium, pallii vſum præuidimus concedendum. Quo non aliter te vti memineris, niſi in propria tuæ ciuitatis dimiſis iam filiis ecclesia procedens, a ſalutatorio ad ſacra Missarum ſolennia celebranda: peractis vero Missis, idem in ſalutatorio rurſum curabis deponere. Extra eccleſiam vero non amplius illo tibi, niſi quater in anno, in letaniis

quas addecessorem tuum Ioannem expressimus, vti permittimus; hoc nihilo minus admonentes, vt sicut a nobis huiusmodi decoris usum ad sacerdotalis officii honorem largiente Domino percepisti, ita etiam morum atque actuum probitate ad Christi gloriam suscepsum adornare contendas officium. Sic etenim alterno eris inuicem decore conspicuus, si ad huiusmodi corporis habitum mentis quoque tua bona concordent. Omnia etiam priuilegia, quæ tuæ pridem concessa esse constat ecclesiæ, nostra auctoritate firmamus, & illibata decernimus permanere.

## EPISTOLA LV.

## GREGORII PAPÆ I.

AD IOANNEM EPISCOPVM CORINTHIORVM.

Quomodo gregem Dei gubernare debeat.

*Gregorius Joanni episcopo Corinthiorum.*

**P**OSTquam Deus noster, cui nihil occultum est, de ecclesiæ suæ gubernatione nefandam pollutionis pestem abiiciens, vos ad eius voluit regimen adducere, magna vobis præcauendum est sollicitudine, vt post vulnera, & diuersa prioris mali pastoris contagia, in fraternitate vestra grex dominicus consolationem ac salubre medicamentum inueniat. Sic ergo præcedentis contagii maculam manus vestræ actionis abstergat, vt nulla execrandæ prauitatis illius vestigia, nullam finat manere memoriam. Sit igitur erga subiectos sollicitudo laudabilis. Exhibeatur cum mansuetudine disciplina. Sit cum discretione correptio. Irام benignitas mitget, benignitatem zelus exacuat, & ita alterum condiatur ex altero, vt nec immoderata vltio plus quam oportet affligat, nec iterum frangat rectitudinem disciplinæ remissio. Instruclio commissi populi fraternitatis vestræ sit actio. Videat in vobis quod diligt, cernat quod imitari festinet. Exemplo vestro viuere docetur. A recto itinere te duce non deuiet: ad Deum vos sequendo perueniat, vt tot ab humani generis saluatore retributiones accipias, quot lucra ei operatus fueris animalium. Labora itaque, frater carissime, & ita totam mentis & cordis ad hoc efficaciam dirige, quatenus digne in

*Concil. Tom. 13.*

Mmm ij

*Luc. 19.*

futuro merearis audire: *Euge serue bone, & fidelis, intra in gaudium domini tui.* Pallium vero, sicut per epistolam vestram, quam per Andream fratrem & coepiscopum nostrum suscepimus, postulaatis, direximus, quo ita vos uti necesse est, sicut prædecessores vestri vni, concedentibus nostris prædecessoribus, approbantur. Præterea peruenit ad nos, quod in illis partibus nullus ad sacrum ordinem sine commodi datione perueniat. *Quod si ita est, flens dico,* gemens denuntio, quia cum sacerdotalis ordo intus cecidit, foris quoque diu stare non poterit. Scimus quippe

*Matth. 21.*

ex euangelio quid Redemptor noster per se met ipsum fecerit; quia ingressus templum, cathedras vendentium columbas euerit. Columbas enim vendere, est de sancto Spiritu, quem Deus omnipotens consubstantiale sibi per impositionem manuum hominibus tribuit, commodum temporale percipere. Ex quo, ut prædicti, malo iam innuitur quid sequatur: quia qui in templo Dei columbas vendere præsumperunt, eorum Deo iudice cathedrae cederunt. Qui videlicet error in subditis cum augmento propagatur. Nam ipse quoque qui ad sacrum ordinem perducitur, iam in ipsa prouectus sui radice vitiatus, paratorius est aliis venumdare quod emit. Et ubi est quod scriptum est:

*Matth. 10.*

*Gratis accepistis, gratis date?* Et cum primo contra sanctam ecclesiam simoniaca heresis sit exorta; cur non perpenditur, cur non videtur, quia eum quem quis cum precio ordinat, prouehendo agit ut hereticus fiat? Quia ergo hanc nefandissimam prauitatem sancta vniuersalis omnino damnat ecclesia; hortamur fraternitatem vestram, ut tam detestabile & tam immane peccatum de locis omnibus, quæ sub se sunt, sollicitudinis suæ modis omnibus compescat instantia. Nam si quid tale aliquid deinceps fieri senserimus, iam non verbis, sed canonica hoc vltione corrigemus; & de vobis, quod non oportet, aliud incipiems habere iudicium. Nouit autem fraternitas vestra, quia prius pallium nisi dato commodo non dabatur. *Quod quoniam incongruum erat, facto Concilio ante corpus beati Petri apostolorum principis,* tam de hoc, quam de ordinationibus aliquid accipere sub disticta interdictione vetuimus. Oportet ergo ut neque per commodum, neque per gratiam, aut quorumdam

supplicationem aliquos ad sacros ordines consentiatis vel  
permittatis adduci. Nam & peccatum, sicut diximus, gra-  
ue est, & sine correptione hoc non patimur remanere. Su-  
prascriptum vero Andream fratrem & coepiscopum no-  
strum ob hoc tarde suscepimus, quia renuntiante fratre &  
coepiscopo nostro Secundino didicimus, epistolas vestras  
sibi eum in Ioannis Larissæ episcopi excusatione finxisse.  
Et nisi bona vestra nobis quæ audiuimus suaissent, nulla  
illum habuimus ratione suscipere. Data die xv. mensis  
Augusti, indictione XIII.

## EPISTOLA LVI.

## GREGORII PAPÆ I.

AD EPISCOPOS GRÆCIÆ.

Vt nullus per præmium ordinetur. Pariterque exponit,  
quod Dominus cathedras columbas  
vendentium euertit.

*Gregorius uniuersis episcopis per Helladiam prouinciam constitutis.*

**G**RATIAS omnipotenti Deo vobiscum, fratres carissimi,  
mi, referto, qui latens vulnus, quod antiquus hostis in-  
tulerat, ad omnium fecit peruenire notitiam, & de eccle-  
siæ suæ corpore salutifera illud incisione compescuit. Ex  
qua re & gaudendum nobis est, & dolendum. Gauden-  
dum quippe de correptione facinoris, dolendum vero de  
casu fratris. Sed quoniam plerumque alterius casus alte-  
rius solet esse cautela; quo quisque cadere timeret, attendat,  
aditum hosti non præbeat, non putet latere quod agitur;  
nam Veritas clamat: *Nihil opertum quod non reueletur,* 2 Cor. 13. 5. Mat. 10.  
*cultum quod non sciatur.* Hæc enim vox actionis nostræ iam  
præco est, & ipso teste modis omnibus adducitur ad publi-  
cum quod agitur in secreto. Aut quis aëtus suos ante il-  
lum nitatur abscondere, qui eorum & testis & index est?  
Quia vero nonnunquam dum aliud attenditur, aliud non  
cauetur; oportet vt contra omnes hostis insidias quisque  
debeat esse solitus, ne dum in uno vincit, superetur in  
altero. Nam & terrenus hostis, qui munita loca cupit in-  
uadere, pugnandi arte sic vtitur. Latenter quidem ponit  
insidias, & ad unius locis expugnationem totus ostendit,  
vt dum ad defensionem loci illius ubi instat periculum

Mmm iij

conuenitur, loca alia de quibus nulla est suspicio capiantur. Et euenit, vt qui cognitus resistentis virtute repulsus est, latens obtineat quod certando non potuit. Sed quia in his omnibus diuinæ protectionis auxilio opus est, voce cordis singuli clamemus ad Dominum, dicentes: *Domine, ne longe facias auxilium tuum a me, ad defensionem meam respice.* Manifestum namque est, quia nisi ipse auxiliatus fuerit, & ad se clamantes defenderit, hostis noster vinci non poterit. Præterea epistolam caritatis vestræ per Andream fratrem & coepiscopum nostrum suscipientes, pallium Ioanni fratri nostro Corinthiorum episcopo nos transmisisse cognoscite: cui vos magnopere conuenit obedire, præser-tim dum hoc sibi & antiquæ consuetudinis ordo defendat, & bona eius, quibus ipsi testimonium perhibetis, inui-

Psal. 39.

Iuo part. 5.  
cap. 108.  
Broc. libro  
1. cap. 21.  
Grat.

Matt. 22.

Matt. 10.

tent. Quibusdam namque narrantibus agnoui, quod in illis partibus nullus ad sacrum ordinem sine commodi datione perueniat. Quod si ita est, flens dico, gemensque de-nuntio, quia cum sacerdotalis ordo intus cecidit, foris quoque diu stare non poterit. Scimus quippe ex euange-lio quid Redemptor noster per semetipsum fecerit, quia ingressus in templum, cathedras vendentium columbas euertit. Columbas quippe vendere, est de sancto Spiritu, quem sibi consubstantialem Deus omnipotens per impositionem manuum hominibus tribuit, commodum tempore percipere. Ex quo, vt prædixi, innuitur quid sequatur: quia qui in templo Dei columbas vendere præsum-pserunt, eorum Deo iudice cathedrae ceciderunt. Qui vi-delicit error in subditis cum augmento propagatur. Nam ipse quoque, qui ad sacrum ordinem perducitur, iam in ipfa prouectus sui radice vitiatus, parior est aliis vendere quod emit. Et ubi est quod scriptum est: *Gratis accepisti, gratis date?* Et cum primo contra sanctam ecclesiam si-moniaca hæresis sit exorta; cur non perpenditur, cur non videtur, quia eum quem quis cum precio ordinat, prouehendo agit vt hæreticus fiat? Ideoque hortamur, vt nullus vestrum denuo hoc fieri patiatur, sed neque gratia aliquius, neque supplicatione aliquos ad sacros ordines au-deat promouere, nisi eum quem vita & actionis qua-litas ad hoc dignum esse monstrauerit. Nam si aliter fa-cutum denuo senserimus, districta & canonica illud noue-

ritis vltione compesci. Data die xv. mensis Augusti, in-  
dictione xiiii.

EPISTOLA LVII.

GREGORII PAPÆ I.

AD RELIGIOSOS IN ANGLIAM EVNTES.

Hortatur eos qui in Angliam profiscuntur, vt nullis  
laboribus perterreantur, sed inchoata perficiant.

*Gregorius episcopus seruus seruorum Dei seruis Domini nostri  
Iesu Christi.*

**Q**VIA melius fuerat bona non incipere, quam ab his  
quæ cœpta sunt cogitatione retrorsum redire, sum-  
mo studio, dilectissimi filii, oportet vt opus bonum, quod  
cœpistis, auxiliante Domino, compleatis. Nec labor vos  
ergo itineris, nec maledicorum hominum linguae deter-  
reant, sed omni instâcia, omni que fero, quæ inchoasti  
Deo auctore peragite; scientes quod laborem magnum  
maior æternæ retributionis gloria consequetur. Remeant-  
ti autem Augustino præpolito vestro, quem & abbatem  
vobis constituimus, in omnibus humiliter obedite, scien-  
tes vestris animabus per omnia profuturum, quidquid a  
vobis fuerit in eius admonitione completum. Omnipot-  
tens Deus sua vos gratia protegat, & nostri laboris fru-  
ctum in æterna me patria videre concedat, quatenus et si  
vobiscum laborare nequeo, simul in gaudio retributionis  
inueniar, quia laborare scilicet volo.

Ex Paulo  
diacono li-  
bro 2. c. 34.

GREGORII MAGNI PAPÆ I.

EPISTOLARVM LIBER V.

INDICT. XIV. ANNO ORDINATIONIS EIVS VI.

EPISTOLA I.

AD MARINIANVM EPISCOPVM RAVENNÆ.

De testamento a Ioanne episcopo condito.

*Gregorius Mariniano episcopo Rauennæ.*

**S**ICVT iniusta poscentibus nullus est tribuendus effe-  
ctus, ita legitima desiderantium non est differenda